



節義也余自束髮受書見忠臣孝子義夫節

流連向注之故才能雖不及人而俠烈之性未

肯多讓壯歲逢卦之革自媿代受國忌偷生人世兀山高  
水深靡不遊歷以舒忿鬱久之思難再中杜門掃軌樂

飢衡汶固亦困而不失所享乎柰烽火頻仍荆棘滿目於

庚戌仲春浪迹北遊自吳楚以及齊魯燕趙嗟河山改色

望宮闕徘徊難禁潸然淚下舟車已久恒將旅卦爻象尋

繹人情物理莫不該備故曰作易者其有憂患乎庚申秋

杪歸自吳門抱病中私計八閩併上海瀕國變時吾鄉殉

難苦節輩品誼炳若日星倘或不為文章使將來記一漏

百艾堯堯偉人與愚不肖同湮沒於寒烟蔓草中責將誰

諉公是爰取丙戌丁亥燭理死國潛身沙門暨夫絕意進

取遯世無悶者共若干人一一與為敘述討論務詳取裁





期確之辛酉迄癸亥三歷寒暑克竣帙名曰節義錄凡  
此皆祖宗深仁厚澤培植中來於戲盛矣或以余身沉草  
澤用非史官居然操觚為過孰知史兼褒貶義垂勸戒斯  
錄志在發潛德之幽光外此未經鉛去與史同而異知我  
罪我固不遑恤若云藉此以博名則吾豈敢時一元甲

吞望日也



李黃林孫傳

李時興字將甫閩縣人也大王父鑑宛州府同知父七象

南寧府學教授時興世襲書香處己方正早歲負文名萬

歷乙卯舉於鄉四上公車兩登副榜家貧乞教職授漳浦

縣學教諭作興鬻序倡立規條嚴而得體交遊盡名流守

道施推官吳麟徵尤敬禮焉任滿陞廣東樂會知縣

禮士民不染地方一錢以清介聞安恭洞研盜並有法

撫按交薦時重資格僅擢慶肇府同知未幾丁內艱歸服

闋補江西臨江府治績不異樂會有監生某橫行郡邑時


興執法不少寬假權貴屢為地百計莫移忽制府令調時

興署袁州府篆方戒途某狡脫出猶仍肆橫時興立提斃

杖下然後行袁州遭流賊殘破民不聊生時興招集撫恤

閭閻始免菜色賊魁葉定國經屢討不克時興單騎臨諭

乃就擒奉委監軍勦未山寇裨將妄殺冒功白其狀不少





貸兩臺叙功請實授知府時甲申春首也頃之三月十九  
變知施邦曜吳麟徵殉難設位為文以祭未久南都再壞  
兵馬南下自南口饒吉及瑞臨等府強半皆不保時興盡  
發幼稚還家札示四子各一幅言必厄國狀獲間諜暨緩  
頰者立梟示時備兵道官某語時興兵弱餉竭同向楚督  
何騰蛟告急且求救時興不可強之始皆至萍鄉縣知為  
所給時興出涕語曰公之去留自不救于時興若越此尺  
寸地恐無以見文信國謝疊山於九川遂分手時興入縣  
城民散官遁聞其無人歎曰事勢不反吾籌已熟倘或有  
餉尚可集壯丁背城死守今束手無策何顏更返府城吾  
力已竭負國之罪百死莫贖遂自盡於學宮郡城袁繼梓  
時尚為諸生聞而奔赴與二主簿及耆老釀金殯殮事聞  
紹宗痛哭賜祭贈蔭至乙未年長子鍾鼎運樞回權停武  
夷鍾氏即隱是曲



黃儒永福人也。字而需。為人謹恪。非禮不履。中天啓丁卯  
鄉試。三上公車。未第。方烈皇帝勵精圖治。而闖獻二賊。值  
歲祲。黨益盛。萬死中原。無際。儒嘆曰。大丈夫顧監立。何如  
耳。豈必藉南宮一擢。鳴得意耶。乃謁選授榮縣。丁艱。服闋。  
再補榮。經縣。幅員不滿百里。加以饑饉。連年民無生戀志。  
儒極力撫綏。勸課農桑。菜色黔首。完聚里巷。聞絃誦  
聲。唯時獻賊師尤悍。所至少櫻其鋒。榮誣為四川偏鄙。兵  
力又不足恃。儒朝夕鼓舞。勉以忠義。戶戴其誠。竭力死守。  
如是者經年。賊積忿。大眾悉至。肉薄而登城。遂陷。賊愛儒  
忠壯。誘降者屢。曰。共享富貴。勿自苦。無益萬分。儒曰。吾草  
茅書生。讀聖賢書。奉天子命。宰此殘疆。愧無善狀。不能破  
汝萬段。吐吾氣。力屈於汝。死封疆。乃臣子正道。豈肯向  
汝狗鼠輩。求生活耶。遂遇害。妾二。有姿色。不屈死。僕某。又  
死之。



皆以遠大期許今黃已入仕籍望溢海內子尚艱于一第  
吾亦不解爾闈闈不利年猶未老為謀北方青毡一席尚  
堪背城借一慰一望久之遂補山東高苑縣學訓導孟冬到任  
未兩月賊衆蟻集圍城及門葷食以激職無民社責微服  
匿迹亦無大失士遴笑曰昔子輿氏評曾子居武城師道  
尊嚴不苟其先去以為民望吾職雖士子師已筮仕食君  
祿事體不同安得強借前賢以藉口吾若偷生苟免豈不  
貽舉比羞繼諸君憐而諒我我獨不媿於心乎頃之城陷

士遴慨然投繯聖廟之東廡賊平鄉大夫士鳩金殯殮成  
禮祀學宮後閣部黃道周督師被執不屈標節南京人莫  
不稱冢宰鄭三俊有知人之哲

論曰人臣出身事主任無分內外秩不論崇卑要當靖共  
爾位庶稱不負厥職李公不過知府黃林二公知縣孫公  
訓導耳當天步艱難能鞠躬盡瘁逮至窮迫一死不肯頌



惜使天下守土皆有若人。何至甲申乙酉神州陸沉。若是其速。嗚呼衆庶貪生。明哲取義。君子以為李時興黃儒林。全春孫士遴。慷慨激烈。雖死猶生。

林化熙傳

林化熙字阿暉。福清縣人。居會城。自弱冠遊泮宮。便道學。自任督學。譚昌言名知人。校府庠。拔冠軍。食廩餼。化熙端方嚴毅。嚔笑亦少假借。至事闕名義。則凜然不可奪。食貧。開講。喜怒不形於色。垂老始領恩貢。隆武元年。以人望授國子監博士。時方顛沛。猶諄諄以教育英才為亟。年值丙戌。大江以南。到處土崩瓦解。化熙洞燭時勢。攜眷歸居祖



里是秋自城市及村落無不薙髮易服者。化熙衣冠不改如平日。人或談及笑而不答。久而聞之邑宰拘諸獄。勸誠再三。化熙曰：我男子也。戴乾履坤。從束髮至今。日出入櫺星門數十年。忠孝廉耻胸中素嫻。一旦舉素履而棄之。生平所學為何。令不能奪其志。解省城南。進南闕。途近府庠。語解役少寬假。吾欲拜辭先師。趨文廟前再拜叩首。訖赴總制。總制一見重之。嘆息者屢。語各屬曰：此真男子。吾當成就其節義。令刑市曹行至鼓樓下。顧行刑曰：凡往市曹皆係罪人。所謂刑人于市與衆棄之。我非其倫。到彼何為此地向之大朝門。正為臣子盡節之所。重整衣冠。南向端坐。含笑受刃。

論曰：昭代之亡也。薦紳以身殉國者較往古特盛。而反面事人。奔命恐後也。實繁有徒。林公不過一書生。秉浩然正氣。之。死靡他。草莽偷生。為閣筆三歎。



劉林林連卓鄔林黃傳

劉中藻字薦叔福安人也邑處層巒複嶺川流襟帶故中  
藻為人負氣力而性剝毅幼孤力學遊泮宮食廩餼年二  
十四領恩貢入太學崇禎癸酉中順天鄉試困春官乞教  
職授閩清縣學教諭生童士著殊少強半皆府城附籍中  
藻蒞任嚴而有體黌序中奉若嚴君庚辰年成進士釋褐  
官行人差遼東犒師見邊疆廢弛戰守均無可恃告誡申  
飭三軍為之股慄繼而冊封代藩甫回京復命闖賊肆逆  
北都失守既而南京亦壞中藻歸里每對人談國事輒感  
慨扼腕嘆昭代之有君無臣乙酉夏杪新主即位福州改  
元隆武左都御史何楷疏薦在籍諸臣重稱中藻才堪重  
任適閣臣黃道周授鉞出師語吏部郎余颺吾此行九死  
一生急病讓夷固丈夫所不辭薦能為國舍公誰託為吾  
擇治兵一員佐不逮颺舉中藻道周入告即以兵部主事



召至。陛見便殿。中濬侃侃談恢復勝筭。上喜曰。何異頗牧  
再見。改授兵科給事中。發內帑銀五百兩治裝。統義勇北  
向。柰柄國者有異志。屢危言恐喝。中濬上疏論勲臣跋扈  
有迹。皇上若遷延不出。終必為所制。時魯藩監國浙江紹  
興府。差使臣諭旨。屢不奉詔。朝廷欲得才望拔萃充詔使。  
諸大臣僉謂非中濬不勝任。中濬慨然就道。當日魯藩閣  
部朱大典擁重兵駐金華。中濬至浙江。先謁大典。告曰。公

知江南北所以敗乎。四鎮無同仇之心。吳楚少牽合之師。  
一旦崩裂至此。今上正位閭中。以分則尊。論名則正。如分  
界視等胡越。坐墜可成之業。仁人義士誰不痛心。大典掀  
髯昂肩曰。公言良是。中濬即奉詔書宣讀。三軍咸呼萬歲。  
魯藩聞而大恚。中濬至會稽。護衛殊嚴。入見時不許隨後。  
人偕中濬昌言。魯使抵闕。皇上寬洪延納。設九賓廷見。豈  
意大王今日輕慢詔使。乃至如此。王為心動。竟不辱命而



回時上駐蹕延平中蓀陛見詳述兩浙情形蘊忠仗義者  
雲興泉涌力言夙駕急赴以便號召上頷之即陞中蓀都  
察院左副都御史專理恢勦事務令同朱大典規行殿于  
金華府須後令既而敵人兵馬悉渡錢塘勲臣撤關如升  
虛邑乘輿西行將入兩粵追兵方迫中蓀扈從莫及仰天  
痛哭曰自闖賊犯關北兵南向勢若破竹國家養士三百年  
不意一技莫施陵夷至此予魁壘丈夫受恩有素安能依

阿頰首裂冠毀冕聽命於人哉潛身山谷括蒼義士一呼  
而應者萬人遂復慶元大順壽寧寧德福安吉田羅源等  
縣福寧一州魯藩時駐舟山中蓀差人航海稟命次年丁  
亥魯藩監國入閩中蓀兵威大振於是廣招募積糧餉壁  
壘歸然一新及覘江上規模豫料無濟雖陽為犄角寔思  
畜鋒銳以圖大舉久之各營瓦解敵全力耽口福安彈丸  
勢寢孤自己丑春首圍城守禦歷數月掘鼠羅雀守益堅



氣益壯。至夏，敵衆日增，軍無援，稍疲。中濞知城必破，恐已死，通邑遭屠戮之慘，將現存餉銀糧米罄家產，統造一冊，致書敵帥，為百姓請命。據案長吁曰：「臣力已竭，臣責難塞。」整冠帶北向謝恩，再拜叩首訖，端坐仰藥而終。部下開門納款，敵人環泣而拜，停三日得殯殮，顏色如生。

林汝翥，字大威，福清縣人，性俠烈。萬曆丙午舉於鄉，年纔弱冠，屢上公車不第，乃謁選令沛縣，善政種種，會聞香邪。

教倡亂起，山東蔓延，河南北衆至十餘萬，到處蹂躪，沛其衝也。汝翥起阡陌黔首，激以忠義，作之勇敢，開關出戰，身履行間，未幾擒龍華妖首，脇從解散，傳檄五省，紓當宁吁食憂。當日僉謂承平日久，人不知兵，脫非汝翥倡率，數千閭閻，伐謀制勝，以遏猖狂方張之寇，其勢有不可言者。撫按叙功，天啓三年行取，授四川道監察御史。汝翥感殊恩，屢披逆鱗，次歲巡視北城，權璫亂政，大小臣工，疏無虛日。



朝廷若罔聞知汝翦奮身抗疏略曰陛下于楊璉疏則曰  
欲使朕孤立于上于諸臣疏不曰沽直則曰附和曰姑不  
深究使其誠沽直附和也安可不究若否又安得只將不  
究兩字抹殺至如孤立字樣臣正慮皇上見不及此耳因  
歷引漢曹節王甫唐仇士良王守澄等致剛方遠舉愴壬  
滿朝以為鑒戒疏竟留中頃之小璫曹進乘族嫂曹大妻  
與郝大爭嚷服毒身死統黨傅國興等二十餘人攻房槍

掠波及無辜挾制司官朦朧混報汝翦覆鞫可疑另委再  
勘立得真情曹進計窮求咎免奏方允所請翼日一璫闖  
道殊橫繫之獄始知其為傳國興也治如曹進均伏厥辜  
後數日二閹見工部郎中萬璟被逮幾斃群中消手遂謀  
捏膚懇迨汝翦疏糾而革職廷杖中旨下矣汝翦恐蹈萬  
環故轍微服徒步詣遵化巡撫請繫獄求代奏聞有嚴禁  
中官併明白具奏綸音赴京回奏廷杖畢策蹇南旋由是從此



汝翁直聲聞天下。戊辰年烈皇帝改元。崔魏黨正法起廢  
諸臣。汝翁特立寡援。最後乃陞廣東按察司副使。蒞任禁  
暴詰奸。勦除黎洞諸賊。粵東至今口碑。旋晉本省右布政  
使。汝翁力辭解組歸。隆武元年。以少卿以太鄉召。辭不  
起。幅巾杜門。足迹不入城市。丁亥秋。魯藩監國處。義旂  
濱海尤盛。汝翁嘆曰。吾生平節概固不多讓。所欠者闖賊  
犯上時一死報國耳。吾髮雖種。白從古如馬服君營平  
侯。垂老成功名者。指不勝屈。慷慨誓師。賈勇當先。未幾袖  
執於陣。敵帥涎其貨。未即害。抱病卒。享年七十。汝翁立朝  
大節。蒞治洪猷。詳在熹廟實錄。平妖紀畧。瓊臺紀績各集。  
林望字子野。福清人也。居會城。腸剛貌古。食貧攻苦。居恒  
憫徒習制藝。少諳時務。故博極經史。百家言。與從兄塤弟  
懋勉。一門內自相師友。崇禎癸酉。舉於鄉。上春。官弗第歸。  
杜門屏迹。開講授徒。給朝夕。以代耕。當事者欲覩眉宇。不



可得登癸未進士。令海寧。斯時流寇遍中原。司農告匱。守  
土吏不得不視徵斂為殿。最望攢眉曰。吾奉簡書。牧此菜  
色民。夏楚豈可常用。撫字心勞。催科政拙。古之人有行之  
者。即考下下。固所甘心。惟興利除害。造士為競。變值甲  
申。治有李三。妖術聚眾。塗計捕伏。法協從罔。治悉烏獸散。  
通邑歡呼。守衛士乘亂刁橫。欲豫支一歲餉。遠署群譁。塗  
正冠服坐堂上。叱而諭曰。河南北雖陷沒。我國家三尺法  
尚存。且例安可自我更。泣懇至再。准給三月糧。仍杖其為  
首。鼓噪者三人。戡亂才從容。整暇如此。繼而南都局又壞。  
北兵漸逼。遍延紳士。告以守禦。必欲與城共守。存沒難如  
志。拊胸歎曰。既負所學。又上負國。徒令張睢陽笑人。千載  
上。於是嚴核冊籍。併徵而未解銀兩。藏庫行李蕭然。紳衿  
耆老。攀轅萬計。追送者數百人。屢諭還眾。益不忍。乃邁壯  
勇二十餘。行糧護送抵家。乃返。適唐藩嗣位福州。閣部黃



道周督師北征疏請空階特授戶部員外郎理糧餉兼叅  
贊戎政又以浙民戴空不啻父母改授監軍御史宣諭吳  
楚已行在廷僉以銓衡非林空不可召還擢吏部郎中扈  
從至建寧尚圖閉關死守柰事亡掣肘勢不可為乘輿遠  
引空雨泣歸祖里次歲丁亥秋七月省城以外義旅處  
雲蒸福清縣尤夥空泣請于父曰免平日以未得死國為  
大人羞若今尚偷生人世不特見負媿寸衷亦豈大人平  
昔教忠之旨哉遂陳師鞠旅身先士卒未幾與武進士薛  
九先等戰沒于陣年僅四十有二空文類歐曾詩組三唐  
一生重聲氣不敢濫交忠孝出自天性頃擅制藝早世懋  
勉能文章登丙戌榜舉人時口形詩歌寫牢落不平之氣  
後二十餘年卒

連邦琪字其玉福安縣人也年十餘歲父以貧令其從耕  
及樵邦琪不敢違私竊誦讀夜猶篝燈弗輟隣師開講常



從旁竊聽了大旨私學為文呈諸兄輩衆咸異之為請于其父始得就外傳垂髫遊泮宮試輒前茅年二十四登天啓甲子鄉榜邦琪雖起孤寒能潛心經史子籍動循禮法每困南宮歸即沉酣墳典非公事當事少見其面里閑僉敬而愛之崇禎甲申三月北都變聞邦琪或當食歎泣或中夜起立常語同志以未得一死為憾迨丁亥夏秋義旂蜂起邦琪長吁奮曰三百年來無酷吏奸胥之苛虐少婪弁狼卒之凌侵士橫經而農耕鑿手雖孝廉家食得以日握管城優游藝林伊誰之賜吾今戮力行間使天地有靈恢昔日境土挈兩京以還祖宗策之上也即不幸畢命鋒鏑橫尸原野使後來過者稱曰烈士連邦琪死所徘徊不忍去豈不偉哉遂統率義勇誓師與都御史劉中藻相犄角監國壯其忠特授浙江道監察御史賜勅印軍聲大震期出而浙圖中原經營匝歲麾下屢勝防疎忽敵騎步蜂



涌邦琪領健兒冲鋒竟死敵手邦琪一生因心孝友天資  
純粹經史子集丹鉛幾遍抄纂標序洞入精微惜負未剗  
勵行世母弟邦珩字楚玉縣庠生變後棄青衿

卓震字伯良福清人也從幼敏慧力學負氣節垂髫補弟  
子員即食廩饋歲辛酉熹廟改元覃恩震方弱冠領本省  
貢元屢因棘闈家貧謁選授江西龍南知縣撫字苦心清  
廉鮮匹本邑特建生祠崇祀前此未有也贛州備兵陳士奇

公正無私屬吏少當其意獨震為所敬禮迨陳離任以亢  
直不容挂彈章謫常州府經歷復受知于巡按御史祁彪  
佳委署無錫縣印震仍勵廉撻如在龍南丁艱歸家囊橐  
罄懸送者塞途車難移軌丙戌秋福建變亂卜隱深山賦  
原病詩十九首有終焉之志丁亥秋沿海義兵林立通鄉  
奉以督兵震慷慨秉鉞身先士卒不久被執于陣縛而寸  
磔震毫無戚容罵不絕口直至氣盡乃止震行義文章卓



卓在人耳目不具載特詳其一生大節云

鄔正畿永福人也字德都嘉靖時倭犯福州蹂躪村郭波及永界鄔先世字東橋者率鄉勇捍禦死之朝廷旌表歲祀弗絕正畿即其曾孫也年十五遊泮宮食廩餼正畿有品行工制舉業旁及詩賦前後督學試輒冠軍固恂恂儒生乎任俠翫辭緩急足恃崇禎末年山寇犯永福正畿集勇壯并檄鄰里固守賊威稍戢親詣壘穴理諭次日賊移營伏發獲其大首楊大殲黨數十餘衆解散一縣賴以安枕乙酉唐藩即位福州正畿充本縣恩貢廷試稱旨授戶部司務次歲閩局不支正畿潛身糾合忠勇又之德化仙遊牽連同志艱辛萬狀強半形諸詩歌會魯王監國以內閣錢肅樂薦擢兵科給事中奉勅察覈各處官義正畿毅然自任次年戊子敵救蟻集到處瓦解正畿欲赴海外路已阻隔憤鬱成病匿山僻踪跡者存至正畿強坐呼二弟



暨妻子訣曰今日廼大明兵科鄔正畿死日也旁有哭者  
正色曉之曰人生必有死吾今國亡身殉從文謝二公遊  
九原夫復何憾正冠服北向謝恩繼辭家廟呼酒痛飲毫  
無戚容賦詩云日月存天地彝倫照今古存髮竟亡軀此  
心何曾苦一死畢吾事匪肯稱降鹵上可見高皇下不愧  
宗祖烈魂升雲霄庸鬼孰敢伍江河勢日下更誰肩砥柱  
不必史留名山岳為吾補將勅印付祝融文集交二弟從  
容投繯而卒次日鄉鄰詳報縣尹及丞尉咸至審視嗟悼  
捐金收殮設祭致奠如禮正畿全產第四正重正某先正  
畿卒于陳正衡祝髮稱頭陀另有傳

林琦字玉衡福清龍江里人也家貧攻苦立志節一介不  
苟取興崇禎丙子中鄉榜三困公車乙酉夏福州改元  
授國子監博士先是中原流寇滋蔓琦同友李其香集古  
來忠孝節義彙成一書名曰倫史鴻文梓畢語子弟吾性



劉不能隨俗俯仰脫異日致命遂志當以此集殉葬至丙戌秋福建又蹈覆轍琦退居祖里龍江不預人事非聲氣不得一見其面冠裳峩峩常語同儕昔園綺輩以儲位未定輕赴漢廷吾所不取若桃花源中不知有漢何論魏晉考古自鏡庶幾遇之朝夕文史自娛其哭先帝文輓前後死節諸公詩歌一字一淚後避地海壇死海賊劉奴之手子君雅遵治命將倫史鴻文代元首以葬若有水雲集若

干卷

黃翰伯名漢良閩縣人也王父達卿舉人官知州父鼎舜溫雅有才學未售棘闈受季子封承德郎工部主事漢良賦性俊爽九歲能文即受知當事及壯博綜經史下筆標新領異與弟晉良並擅時名尤粹於易昆仲遯迹深山推明損益之理終致戒於大小過言悉精微非老腐生能窺涯涘然漢良性豪邁匪邊幅介意家固貧食客恒不絕當



崇禎末年世事日非。以儒生朝夕奮發。思報國。蓋武科狀元陳廷對官總兵。為漢良外舅。居甥館時。筆墨暇。遍習武藝。傾心交諸健兒。遼甲申三月。變間。漢良伏劍詣巡撫都御史張肯堂。自陳志切請纓。提學副使郭之奇。福寧知州揭重熙。識漢良有素。僉汲引。延入轅門。語連日夜。遂受命招募義勇。未浹旬。集三千人。戎裝進謁。巡撫暨司道官喜。曰。不意警序中。覩此頗收。時以漢良書生。暫屬大將。洪日新委揭重熙監軍。諷吉啓行。至中途。南京已嗣位。改元有詔。闕師且駐鎮江。時勲臣高傑黃得功二營爭壁壘。縛筏將南渡。江上諸軍力拒。獨漢良飛剡北向。擊惰禽。一指揮高兵始却。功拔萃。尋在廷門戶爭亟。敵愾念仄。陡徙鎮江。陸師守圖山。圖屬下江。離金焦百里。而遙。自是防江柄全歸鄭氏。雖舳艫如織。未幾一戰即潰。一日夜漏三刻。傳北騎過江。我師不振。俄奉令旨。陸營亟進。方拔壘鼓行。薄清



河口遇敵戰方酣漢良右足中箭墜夏港傾洪帥已奔常  
州夏港戍兵將小舸載漢良抵常行收散卒千人號福義  
營時洪敗不支獨漢良與漳郡李翼明率二千人行求乘  
輿達杭州遇諸勳鎮會議南向挾共入福州泊天興建號  
漢良囚服泥首詣闕致軍政部議留金吾衛又調副永勝  
伯出關漢良力辭鬱鬱成勞瘵病臨危語其寬子吾自束髮  
受書即有志報朝廷二百七十餘年厚恩壯丁國難慷慨  
從戎在南京時若有庸主中相猶可支持圖恢復柰厄奸  
回空抱一腔熱腸感疾不起將來生民塗炭目不及見幸  
也遂卒

論曰傳云肢體髮膚受之父母不敢毀傷此道乎其常也  
今劉林連卓鄔黃諸君素履曾已卓卓不幸值千古奇變  
震來覩覩不肯覩面苟免以負所學雖死匪一律均之救  
身成仁舍生取義固屬得正而斃又何毀傷足云



馬劉王傳

馬思理字達生長樂縣人敦品行萬曆壬子舉於鄉天啓壬戌第進士釋褐令烏程烏程為兩浙劇地稱難治思理正己率物飲水勵撻恤民隱禮紳衿未匝歲頌聲四詠舊風頓為丕變滿六載行取擢兵科給事中方崇禎改元當宁清心出治恒側席求賢思理感殊恩事關民生國計無不入告巡視太倉清錢糧數十萬計巡皇城禁暴字弱憫商困請蠲香蠟諸項雖大僚權奸不肯假借所言莫不朝上夕報可時度支不足而節鎮司閫外者多冒費乾沒致戰守無可恃毅廟英明特簡察覈邊鎮兵馬事務思理殫精竭力歲省帑金無筭歷工科左右給事尋兼巡青遼巨璫張彞憲總理戶工二部錢糧自尚書而下盡抑以屬官禮思理堅持憲綱正鈞敵投名刺觸怒索瘢遂以草場失火中傷下刑部獄大凡濕極生火非由人事疎略戶部尚



書畢自嚴特疏引咎科道交章申理得落職歸未幾起尚  
寶少卿晉太僕少卿轉右通政先是少詹事黃道周叅楊  
嗣昌召對忤旨謫江西布政司都事次歲江西撫臣解學  
龍薦舉人才首稱道周上以道周亂政學龍徇私俱召致  
廷尉戶部主事葉廷秀疏救廷杖繫囹圄未三日監生涂  
仲吉踵其後上以思理職納言與道周仲吉皆梓里至仲  
吉廷杖畢並思理同下獄後刑部尚書劉澤深以建言無  
死法密勿設言微中上怒始解道周學龍謫戍思理及諸  
同難概罷職方出都門朝端僉謂破帽策蹇榮勝馳驛思  
理歸杜門掃軌惟事關桑梓不遺餘力通邑公建生祠數  
百年來僅見甲申國變南京改元起通政使未赴隆武元  
年以侍郎召時魯藩遣使往來柶鑿思理極力排解上方  
釋然旋晉禮部尚書丁亥魯藩監國以思理前衛兼東閣  
大學士召朝行在北駕南發扈從弗及以微恙卒於舟次



劉沂春字泗哲長樂二劉人蓋先世礪兄弟從考亭進  
崇祀理學後未遂以二劉名其里沂春淵源有自質樸力  
學萬歷戊午舉於鄉崇禎甲戌登進士任烏程縣前令馬  
思理政教優粹沂春與同鄉益實心出治士民口碑謂自  
設縣官以來惟馬劉二公不媿父母之稱丁艱歸服闋陞  
刑部主事明刑弼教十時奸胥斂迹時行人熊魚山忤政  
府下獄勘問沂春持平不少徇旋經廷駁沂春曰古云刑  
期無刑正以輕重得其衷也張釋之為廷尉不敢為人主  
移况三尺法豈人臣阿世之具耶堅執前擬因去職沂春  
夷然就道甲申變留都起工部隆武元年任布政司叅政  
晉太常寺正卿丁亥歲魯藩監國位吏部左侍郎無何屏  
迹杜門永賁立園衣冠楚楚不改昔日久之失明又十餘  
年卒享壽八十有三

王恩及長樂人也字戴君少端莊不屑與群兒伍從師肄



業山庄階前忽出竹筭一晝夜光齊几上恩及顧笑曰大  
丈夫氣節勁直不回不當若是耶凡方策內見忠臣孝子  
義夫節婦未嘗不流連向往之小試屢屈有司歲辛酉嘉  
興譚督學拔冠長邑遂以儒士領是秋鄉薦黜困南宮時  
邊徼多事中原連年饑饉寇盜遍江以北恩及目擊心傷  
思屈志百里紆當宁憂崇禎癸未年謁選令廣東信宜縣  
地界兩粵萬山中夷獠雜處恩及勉力撫綏恩威互用不  
期月風俗頓更甲申後四郊多寇恩及集壯丁捍禦間出  
勦賊躬冒矢石賒治賴以得完當宁才之隆武二年召赴  
行在欲破格擢用國勢不支乘輿出幸恩及從間道歸養  
老母身負坏土經營先墳工竣中林得毒草藏<sub>以</sub>備用丁亥  
秋魯王監國召為監察御史猶正色立朝時事棘且殆毫  
無忿鬱不平之氣至戊子夏五與孺人李氏同仰藥全節  
魯人翰字明克長樂人也天秉剛毅不事浮華弱冠遊泮



宮旋食餼授徒講業門下成就甚衆丙戌秋換次應歲貢  
人翰鄉居抗志督學行牒促赴考亟人翰語催役曰未俗  
寡廉鮮耻欲全軀取功名者甘薙髮汝亦知有不畏死男  
子曾人翰乎欲殺欲割唯命此髮終不可動時當事尚知  
名義置不問未幾病將屬纊起坐取冠服審視身着含笑  
而卒全縣尚有貢生陳兆鼎字克重大王父瑞大父長祚  
俱官尚書癸未進士中書舍人翔同母弟也以世沐國恩  
不肯薙髮守志確不可奪向居省會丙戌秋歸長樂祖里  
踪跡不到城市經一年病卒

論曰語云士窮乃見節義假若時值承平建功立業中才  
亦可奮勉惟是天崩地坼亘古奇變如馬劉二公從容委  
蛇而得死所王公伉儷死節成雙要之非蹈道有素安克  
臻此



王林傳

王忠孝，惠安縣人也。字愧兩，性方直，勤學勵行，恒以古賢自勉。丁卯舉於鄉。次年戊辰，崇禎改元，成進士官戶部主事。官草場，收放過於精核，忤璫，被誣削籍歸。村居杜門，文史永日，迹不入城。當事罕識其面，布衣蔬食者十有五年。甲申聞變，哭經月，幾失明。抱病骨立，濱死者數頃之。南京起廢，名屢形薦剌。時馬阮秉政，忠孝嘆曰：「先皇帝英明，遠過漢宣，唐憲痛天步多艱，盱食宵衣，勵精圖治，祇為庸相無能，舉朝戮力，門戶置國計民生膜外，致流寇遍中原，卒至土崩瓦解，不可救藥。今乾坤再造，卧薪嘗胆，求賢若渴，猶恐不濟。况夫主既昏庸，當路者專與才能冰炭。祖宗三百年天下，豈容鼠輩再破壞耶？堅卧不出。」乙酉夏，福州改元，起太常寺少卿。忠孝陛見，後痛哭上言，必須由江西浙江出兵，圖復兩京。若保守一隅，總屬坐而待斃。趙宋覆轍。



非遠云云。悉中興碩畫。上聽其策。惜政柄下移。末由自主。忠孝悲事勢不振。請假歸。復以左副都召。已不可支矣。忠孝忠勇奮發。起義兵。親歷行間。從丙戌丁亥。抵戊子。秋百計。枝梧心力俱竭。乃移眷居廈門。粵西嗣位。差人走聞。道達行在。疏陳恢復大計。永歷元年冬十月。晉戶部左侍郎。忠孝力辭。栖遲島外。斂德避患。介于石。久而不渝。即饗殮。弗給。餽遺不肯輕受。環海自大將。以至偏裨。莫不敬愛。後居臺灣。未幾。貴志卒。

林蘭友字自芳。仙遊人也。性樸直。從幼忠孝。自命。登崇禎辛未進士。選廣西桂林知縣。烟瘴僻遠。向未選君。皆以授鄉貢。未有甲榜。宰其地者。蘭友笑曰。既已委贄為臣。便當夷險一視。何烟瘴足憚。蒞任。宣力出治。明敏果斷。偏壤歡若更生。滿六載。行取除試御史。時少詹事黃道周叅內閣。楊嗣昌奪情。召對平臺。忤旨。舉朝震懼。蘭友上言。大臣不



知有父安知有君古云求忠臣必於孝子之門嗣昌曾任  
中樞寇酋交誼一意伴食半籌莫展今又墨經而居端揆  
尚可謂有人心乎云云疏奏降三級補光祿寺監事甲申  
春二月陞南京考功司主事未行遂闖犯闕蘭友匿古剎  
迨賊西竄始徒走步南旋乙酉福州改元起監察御史巡  
按江西時州郡強半淪沒人心風鶴蘭友正己率屬招集  
流亡一時地方賴以少安有旨加太僕寺少卿尋召回掌  
河南道事蘭友疏叅閣臣曾纓降三級頃之丙戌秋福州  
局天壤蘭友見平日垂紳播笏高談節義者咸脂韋思全  
軀保妻子喟然長吁曰國家養士三百年時危一枝莫施  
國亡尚持首鼠生平所讀何書吾今不能如袁粲顏見遠  
罪已擢髮難數况渝志乎倡率同仇集義勇大建旗鼓練  
兵措餉百九艱辛氣未少衰至戊子秋獨力難支避居海  
上時金門廈門湄州海壇兵力尚健蘭友知其志趣不振



飄然事外遨遊諸島括囊同寒蟬未幾卒遺命殞只常服  
畢即葬墓碑但書大明罪臣林蘭友不必官銜勿令吾冥  
冥中負媿也可蘭友處海上與忠孝及某某交相砥礪後  
或匿金夫或亡命潛歸惟忠孝蘭友二人歸然不欺其心  
林說字傅公莆田縣人弱冠遊泮宮崇禎壬午書經魁鄉  
試第五名癸未避嫌未試南宮變甲申乙酉終日號哭曰  
不能馬革裹尸死鋒鏑下豈不負此七尺軀罔稱鬚眉男  
子丙戌秋九月咏花藥夫人詩曰君王城上樹降旗妾在  
宮中那得知十四萬人齊解甲更無一个是男兒逃入深  
林時薙髮令峻踪跡難掩作字稟父母誠子弟訣親知不  
復粒食越十餘日卒

林尊賓莆田人也字燕公少即力學能文試多冠軍嚴氣  
正性不啻秋霜烈日崇禎壬午以春秋領鄉薦第四癸未  
下第歸蓋下帷攻苦甲申乙酉長日浩嘆寢食俱廢者數



每語同儕吾生不能戮力行伍死必為厲鬼滅賊報國以  
吐吾氣會福州嗣位尊賓首上封事歷指從前諸臣悞國  
罪因條陳戰守事宜稱旨賜白金文綺尊賓慨秉權非人  
拂衣退處洋城大學士黃道周疏薦剴切屢奉明旨尊賓  
稱病堅卧不起次年丙戌秋潛身荒陵屏迹誦讀冠裳  
我丁亥監國特旨授兵科都給事中督率各鎮義旅尊賓  
慷慨秉鉞誓死恢復時呼偏裨健兒激以忠義與太僕  
少卿林蘭友相犄角遷延日久師老餉匱竟被創畢命於  
小林地方副將林聚之驍勇絕倫屢陷陳衝堅以輕敵先  
尊賓沒于興化城下莆陽曾世袞字長脩梁鼎鍾字夏章  
陳憲綰字伯樞俱以丙戌丁亥先後致命遂志

論曰男子一生必歷諸夷險死生然後人品始定如王忠  
孝林蘭友二公立身行已炳若日星乃值天命靡常困益  
甚而念益堅卒能明哲保身成一代完人林說林尊賓兩



孝廉等之未字女子痛國祚傾移不肯偷生苟免以視利  
必趨而害則避不復義理較量者奚啻蝓蛄之與神龍





陳鄭傳

陳家麟字恭夫長樂庠生恂恂儒素言行謹恪族中科甲  
三百年来盛冠一郡甲申乙酉痛國運淪喪終日鬱鬱不  
自得丁亥夏秋沿海義兵遍起家麟喜曰此吾致命日也  
大事濟否固知有天安能效兒女子逡巡不出貽終天恨  
哉結義勇百餘分隊伍隊各有長家業不踰中產罄所有  
佐軍鼓行而進竟以無後援死之

鄭大奏福清人也邑庠生嚴氣正性器宇軒昂雖貧士高  
行濶步無寒酸狀同輩咸敬禮焉呼之曰鄭拗甲申變故  
報至福寧知州揭重熙挺身勤王郡中倡投櫃助軍需首  
事並無匪人大奏日日往來其旁防乾沒當日咸嗤其慙  
不得不服其正不兩載南京福州俱踵故轍大奏長吁出  
涕曰國事瓦裂遂至此極乎吾年踰知非死何足惜但恨  
徒死無益耳丁亥秋七八月義旌到處皆起而福唐倍盛



為帥者概祭旂誓師大奏顧笑曰如斗大城一鼓可下如許迂腐何為仗劍出遶鄉勇將百人不備糗糧或訝之則曰待我城此坐縣堂與諸君痛飲未晚荷戟當先將登城被執寸磔於市無戚容

論曰人臣不幸遇乾坤大變能不惜身殉國允也得死所若草澤書生無民社責祿未霑手升斗似亦可以無死陳家麟鄭大奏兩青衿肯愛鼎而優游岩壑置身物外固已足以明高率不滿百烏合之衆赴敵如脫兔甘死匪顧此亦確有所見非苟焉而已也故表而出之以為天下後世勸



董陳張嚴高林陳傳

榕城青門謝 杲述

董謙吉字德受閩縣琅江人大父廷欽乙榜官同知府事  
父養河才名重當世數竒應崇禎己卯歲貢庚辰試大廷  
欽賜進士歷官戶部員外郎旅食京師坐客常滿親故仰  
給無倦容為少詹事黃道周建言忤旨牽連下獄與戶部

主事葉廷秀倡和西曹秋思詩名都門事平復原官卒於  
任謙吉繩世業高才豪爽年三十崇禎庚午辛未聯捷成  
進士不耐簿書授建寧府學教授踰年陞國子監博士轉  
戶部主事晉員外郎出差湖廣督鑄以傲不諧俗為猾胥  
所中白還職陞陝西按察副使遂掛冠歸弘光元年隆武  
元年召俱不起乙酉歲福州為輦轂下凡廢棄林泉者莫  
不翮口臙仕屢遷陟清顯惟謙吉優游塵表丙戌秋削髮



為僧室如懸磬饗殮難給故舊宦聞不肯呈身一見後二  
載卒於琅江故第

陳燕翼字仲謀候官縣人。國心孝友尚氣節耻隨俗俯仰  
天啓甲子舉人崇禎甲戌進士。遷廣東程鄉知縣地膏腴  
向來署中需用無大小悉取給地方燕翼至任盡革從前  
陋規祇飲程鄉江水專務以德化民有不率者蒲鞭示辱  
而止邑中稱為陳觀音。至治古氏獄及不受楊千總破賊  
金解制府待用事難殫述在邑六載士民仰若怙恃制府  
撫按交薦辛巳行取擢工科給事陳言累切時弊適河南  
被水淹藩封暨諸郡縣淪沒無子遺燕翼上疏為國賊未  
除賞奸非法乞正一時之悞恩以昭萬世之公是事竊惟  
從古聖帝明王所以勵世磨鈍鞭撻四夷者唯撻威福予  
奪大魁柄謹其僭濫而防其旁落故雖寇賊姦宄並時竊  
發而穆清之上足以靜鎮有餘從未有藩封淪沒生靈魚



驚自河以南郡縣失階殆盡而地方在事諸臣尚四陞擢  
加級之賞如今日者也夫威福予奪二者二祖列宗所寵  
之陛下以示法於聖子神孫千萬世守之雖陛下不敢私  
焉者也大臣擅之則為無將小臣冒之則為窮奸部院臺  
省諸人知而不以入告則為扶同欺罔不則為畏死避禍  
臣諫官也臣滋懼身臣向辦事科垣見邪臣黃澍守汴至  
苦一疏纍口萬言其自叙與代人出脫不啻張巡郭子儀

岳飛而其自命作者又不啻陳琳司馬相如一紙謾書滿  
口胡柴不唯目無天下人而且藐視至尊矣臣與同垣高  
翔漢如愈彭瑄三人對面共讀推案頓足相語嘆息意  
此疏近理亂真偶動聖聽票擬若悞旋當追入改正或職  
兵諸臣應有言者水落石出似可靜聽議論之定無何而  
司馬覆疏上矣覆疏雖未盡如澍所請而炤覆疏又上矣

未幾罪撫高名銜居然御貳矣任濬居然起用京堂矣一



時守土諸臣或加級或優擢居然以罪冒功受之不疑嗟  
嗟是固所以叙守汴之功也試問當日守汴汴在否乎決  
河灌汴天灌之乎賊灌之乎抑守汴撫按諸臣自灌之乎  
河水驟至洶湧如山馮夷效靈豈真艤舟城中以待試  
當時百萬生靈俱死而撫按各官又何以獨生撫按要緊  
官員俱生而么麼不急佐領之員又何以偏死蓋臣讀同  
官劉昌指名決河一疏而在事同謀諸奸已如見其肺肝  
矣昌為尊者諱為要人諱而徘徊落筆獨歸罪於乙榜破  
甑被處之巡蓋亦無可柰何矣嗟夫決河避賊免死封  
疆千古創獲不經見事撫臣一方主持每事關焉未有名  
衡不職倡而嚴雲京敢職和者也且未有心腹推官不豫  
謀於兩臺而能以一人一時獨主之者也且微論汴事試  
問名衡以巡方速化躡撫兩河在事幾年唐福諸藩報陷  
誰乎列郡名城互存有幾是皆河水灌之陷乎抑撫臣調



度節制有失乎。以人力之矯揉而歸咎造化。則欺天以千  
百年大河之靈氣。襟帶畿甸。而一旦激作之。使湍悍旁出。  
變移形勝。則誣地以數百萬生靈。狗數人之官爵性命。則  
誣人以三百年來安流故道。而使之潰決南徙。岌岌把陵。  
寢則得罪祖宗。以南北一綫。漕米灌輸之命脉。惜水如血。  
而使之嚙淮梗運。則撓悞邊儲。以辦寇辦鹵。大農告匱。三  
空四盡之時。而無端令感損水衡錢。疲物力。則上憂至尊。  
名衡等負此六可斬大罪。幸以詐病解任。不埋名匿影。祈  
死家園。乃敢悍然與黃澍謀。此裏呼外應。無非負重罪。恐  
不免旁人論列。姑架大功。張虎皮。嚇而掩之。意天下人或  
無心無目。復無口。雖言官可威勢黨。與挾之。不敢動耳。嗟  
夫。猶有鬼神。蓋澍以二年半推官。借題速化為此。以報名  
衡。卯翼大德而已。與焉。而謀報澍者。亦以此酬其驅除礙  
手。禦災捍患之功臣。然而其所播弄者。皆祖宗朝廷之威。



福子奪而其所干犯者皆神人之所憤怒呵譴也嗟嗟以  
澍生平夫人知之矣澍本 寇族其俗婦女每春日佳  
景里盡出冶容遊玩澍以美少年攘臂其旁宴飲戲狎自  
諸母妯娒而下各有品評顏之曰百美圖一概繫小詞其  
下用博歡笑族人 欲殺之逃匿武林然則澍固江  
南之鄭鄴莊應德杭州之許應 也以其居家行誼本末  
所為爾上毋怪於君臣大義藩封疆土民生性命一切鹵  
莽而立論變亂無人 臣禮至此臣向與名衡無交無隙與  
澍尤先後同師然大故當絕鳴鼓必先况今疆場日駭醜  
孽未靖事關宗社舉示四夷竊觀用兵以來廣寧陷而經  
撫均辟鳳陽燬而撫按並坐德藩陷而東撫立誅襄陽陷  
賊入川而督撫諸臣駢首受戮即真定失一二州縣而保  
撫不免今大河諸藩甚於襄德河南郡縣大抵淨盡而同  
罪異法罪大者反見賞見原而又重以欺君說謊之惡將



何以瞑熊廷弼王化貞揚一鵬顏繼祖鄭崇儉熊文燦邵  
捷春張其平等諸臣之目又得無為范志完等豫埋公案  
俟鹵退而叙功乎臣知言必獲罪然遇此等大事不言使  
天下後世載筆書曰某年月日汴城決河叙功臺省諸臣  
舉無敢異議者自顧此時何以覩顏瑣闥之列而使天下  
後世有以量吾君乎與夫今日不言雖生猶死毋寧冒死  
而言請下臣章與澍原詩叙功一疏令廷臣會議果有良

心盡泯能為名衡等一言出脫者臣請受妄言之罪伏乞  
聖明總攬太阿慎重名器收回成命無令邪臣變亂朝政  
刻印銷印昭垂萬世聖子神孫臣不勝愛君憂國激切願  
望之至疏上奉旨陳燕翼 苛議着吏部議處尚書鄭  
三俊覆疏論救擬罰俸不允降二級 補翰林院孔目

然疏雖未行在廷為之氣懾頃之奉差出京便道還里時  
辛未進士原任蘇州府推官周之夔牛李不睦為當事所



隋通省莫敢為出一言燕翼令家人投保狀抑揚反覆淋漓滿幅稍吐紳士之氣弘光元年擢吏科右給事燕翼至南京上中興正自可為一疏權貴側目轉禮科左冊封琉球出隆武改元陞吏部都給事閣臣黃道周言陳燕翼品行才學堪資啓沃若僅置諫垣未免用違其宜奉旨改翰林院編脩旋晉司業又陞侍讀學士管少詹事專理史局燕翼先後建言無盡虛日十議一疏尤剴切丙戌秋與太常寺少卿張利民同削髮為僧卓錫雪峯古剎當事必欲延致燕翼緇服造拜一見便歸又居連江山寺次年感疾泣辭老母不得終養虧子職端坐而卒享年五十有三燕翼孝友出乎天性凡值忌辰泊吉事必痛哭不休以嚴君從少教誨弗及見其成立為恨奉母畢生不輟孺慕官廡無長物百冗儉約惟甘旨稍豐愛母弔劬翼倍於諸子

尤人所難云



張利民，侯官縣人也。字能因，幼失怙，勤苦力學，年二十四，舉於鄉。數困南宮，淡泊有守，耻干謁。崇禎庚辰，登進士。壬午春，選安慶府桐城知縣。時流寇逼中原，桐屬要衝，同輩咸為心慄。利民毅然叱馭，行李夏抵南京，星言西赴。蓋桐城兼苦兵，向日市里繁華，人烟輻輳，悉蕩為邱墟。數百里絕無人迹，利民艱辛百倍，方履其界，城門晝閉者數月。聞新令到，始啓闕，延入。晉後寥若晨星，邑中蓬蒿觸目。紳衿大戶，強半避居留都，正供將問，諸水濱令長丞尉，餬口不足。寇賊近者七八十里，遠者二三百里，有叅將陳監紀通判邵奉湖撫令統兵援勦，營近郊無紀律，悍卒播虐甚於寇。前署篆者無何，只謹閉關隘，出便遭荼毒。民間度日如年，利民蒞任，開心見誠，漸相安。百姓出入乃自由，惟警報急，嚴守禦。後陳邵二營掣回，繼者兵悍將驕，循前轍。利民待如陳邵，最後副將廖應登賊退，防疎為所擒，併隨。



從三十餘賊挾以攻城而廖親黨標兵多在城內利民極力隄防危賴以安無分日夜守禦者經年糧餉告匱心力竭追賊覬伺久難破於癸未秋七月陷湖廣踞武昌一縣官兵乃卸甲宵夜眠始安枕烽火差息而援湖廣經過者又軍興旁午馬料糧米概出百計拮据矧督撫幸寇退令追正供利民痛百里蕭條上懇豁免下勸急公情景悽然西臺累章敘績次年甲申國變南京再造在廷乏員部議推知經正薦者減俸一年送部考選撫按共言皖桐足當極邊不應與各省直比十一月得旨利民臘月離桐城紳衿老穉追送者載途特建生祠名日報功利民乙酉春正月進京二月初四日考選擢戶科給事中初十日入垣辨有叅薦利民統仁秉公不敢少徇情面迨五月初旬通城鼎沸傳駕南向大小臣工奔竄殆盡利民徒步到杭州警報疊聞遂逐隊還鄉隆武改元陞兵科右給事兼刑



工二科召對便殿利民極言險不足恃徒守非計退復疏  
言宜以大將某口屯大營於浙江金衢廣江西廣信等處  
近關若崇安浦城光澤各縣遴才識兼優者為令募土著  
使自為守昭邊方例示激勸蓋重外禦則各關徑道不待  
隄防練民兵則地方人情毋慮搔擾等語稱旨頃之轉禮  
科左次年丙戌春二月晉本科都給事兼吏科左夏四月  
陞太常寺少卿秋八月祝髮披緇衣稱和尚次年丁亥秋  
上下游到處義兵俱起監國以左僉都御史召利民遂料  
不濟堅卧不赴從此磐桓泉石絕迹城市杜口不及時事  
客或談及笑而不答貧異甚甘貞苦節量最高飲竟日不  
醉非人招少赴後一年同年進士何平官福建按察使任  
數月未通聞問令人道殷勤投刺往拜何見利民僧帽緇  
服造膝謝曰觀年兄如此舉止平當媿死無地繼其任某  
亦庚辰同年欲見殊切利民往拜如何平某虎視眈眈頃



利民貧無癩可索乃止利民從此潛踪深邃會城不復到  
癸卯年徂夏卒於田中故里享年六十六先是利民蒞任  
兵寇交訐家中未知情狀揭挈眷以往利民笑曰我坐荆棘  
中隻身難支况八口乎然亦可堅士民固圍心利民生平  
宦績及桐城苦况顛末詳年譜中不細述

嚴通字志吉福清縣人少孤力學崇禎丙子舉於鄉癸未  
成進士甲申春正月赴選三月十九變闖賊逼在京官員

往見通匿道觀半月偵捕差寬微服南旋南都嗣位途遇  
徵書通辭歸省老母嗣除吳縣知縣未赴隆武元年秋七  
月授行人司行人考選擢給事兵科召對稱旨差監永勝  
軍出江西通蒞營會議語主帥江右地聯楚粵勢控秣陵  
實福建出師咽喉今敵初入境防未周民心嗷思漢各  
處結砦固守延頸王師者十室而九宜亟出關箕張星布  
聯絡進取大事可期倘或逗遛敵謀漸備人情亦解非計之



得大將原無出師意聞言遂與通睽疏其不諳軍機有旨  
改差張家玉留通理科事歷掌吏禮兵三科印務通言請  
肅體統以尊朝廷寬徭役以蘇民力攬兵權而振頹綱正  
士習而鼓忠義又如招逋亡勤訓練汰冗員罷工作既前  
後一十六上詳在奏草時魯藩監國駐紹興府抗朝命兵  
士恣行剽掠朱大典據金華方國安營江干日相讐殺金  
嚴一路鞠為茂草敵騎覬渡江大勢岌岌而各鎮受魯王  
封拜視閩宦若冰炭福建奉差者以浙江為畏途命允敷  
下竟未一介往者上召群臣會議通言目今各處報陷惟  
浙江尚能支撐一面須急往宣諭聯絡兼相度機宜而前  
後使浙者並無報命恐悞國事如廷果乏人臣願奉勅行  
吉函安敵計上大喜即加通太常少卿賜方印又差中書  
舍人總兵各一員偕通乙酉十一月陞辭柰當事者惡浙  
謂宜閉關絕其往來通廷爭曰浙人吾人也唇亡則齒寒



若無浙江則福建全孤今開誠勸諭使協力捍禦尚憂不  
濟矧可自斷手足閉門待斃歟當事方語塞通恐沮撓由  
間道達浙江十二月浙兵戰不利退屯蕭山軍中一日數  
驚通聞兼程抵江上慰撫其衆緩頰開道同仇敵愾將士  
感泣方國安等乃封奉詔以次受封三軍歡然通復見朱  
大典極力告語始各悔悟通為主盟兵爭得息紹興紳弁  
咸上表輸誠通差人疏聞身仍留視二營軍事至丙戌春  
首開化報陷通恐閩關風鶴檄江上諸將扼固三衢浙旅  
雖多惟國安麾下騎兵習戰而師老餉匱人鮮鬥志通集  
諸鎮議汰老弱以便宜派浙餉給精兵銳多方接濟示激  
勸方欲條列上報權要嗾人叅通報命稽緩奉旨嚴通降  
二級召回諸鎮挽留再三通以君命難違不敢緩回進闕  
乘輿已移駐建寧上脩諳通忠誠勞苦陞兵科右給事加  
二級通痛哭陳江上要害與閩閩切今將士饑疲乞亟議



策應又列八款進疏。再上不報。通復奏江上若置膜外。勢必不支。仙霞關又安足恃。關將須掄智勇精忠者。嚴勅固圍大駕。請幸贛州。聯楚粵圖進取。亦出中策。廷議僉勸移蹕如通言。柰柄政者心叵測。力沮勿出。上不得已。停延平。尋差冊封遼府。通夏五陞辭出。秋。仙霞關不保。駕西向通間道歸故里。島上圓頂為僧。次年丁亥。秋八月。監國以僉都御史。又以兵部右侍郎召。俱不赴。日與同志。歷名勝。引蒲賦詩而已。後楚世子成治被執。波及下獄。通毫無戚貌。語門人高暘曰。生必有死。聖凡一轍。最上死忠孝。吾海瀕男子。讀聖賢書。登皇明甲榜。為天子近臣。今得畢命。上不辱親。下不辱身。夫復何憾。即慨然仰藥。高暘字虞卿。亦福清人。向侍函丈。自通被逮。至卒。終日周旋左右。直至殯殮。扶柩還其家。通一生勵行。庭無雜客。早年與博士林。化熙吏部林銓共敦操履。變後與萃士石鏡孝廉樊翻為詩文。



山水之契學博才高文追先秦西京詩宗初盛唐所著白  
漁集蘭閣逸纂兵垣諫草春秋箋若干卷藏於家

高天爵字玄錫先世洪武初仗劍從龍建績世襲福州中  
衛指揮使天爵豪爽備文武才襲官職掌外祕文史自娛  
自萬曆末年世值承平文恬武嬉漸已伏戎於莽崇禎時  
連年赤地千里流寇日盛天爵常以世受國恩尸位素餐  
自慙甲申乙酉大變天爵撫胸泣嘆曰朝廷養士多年不  
幸有變束手無策雖屬天步而柄國之罪擢髮難贖使當  
日職兵仗節者果能出奇料敵何至流寇遍中土北馬飲  
江水若是其速乙酉年唐藩嗣統福州奇其才陞錦衣衛  
當事志不可測天爵鯁口恢復為念屢陳戰守大計悉中  
機宜柰聽者藐藐丙戌秋天爵潛身糾合勇敢激以忠義  
次年丁亥監國至遂大建旗鼓慷慨誓師潛然出涕曰不  
才天爵世沐大明恩澤今國破家亡與諸君挺身血戰恢復



昔日境土直抵幽燕受爵明君之前然後歸老故鄉誠曠  
世一事也若果上天不佑使天下後世知世胄中以身許  
國有高天爵者何幸如之師出以律凜然不可犯枕戈經  
年柰師老敵救日增各營星散天爵勢孤北向再拜祝髮  
奉佛於雙溪里絕口舊事同志過從即焚香煮茗坐談竟  
日分韻賦詩後二年卒

林逢經長樂人也字守一父世章嘉靖乙丑進士官工

部郎中父裕陽萬曆丙子舉人官雲南臨安知府逢經幼

聰敏長博洽多才年十四入泮宮尋食廩餼試輒高等松

江夏允彞知長樂縣公正與逢經文字契福州改元三

事交薦欽授誥勅撰文中書舍人旋兼司經局正字翰林

院五經博士轉兵部武選司主事改翰林院簡討預修毅

廟實錄方天興草創勲鎮跋扈官方無序逢經感知遇條

陳大八事陸續封章屢上或慮貽禍語以職非諫員何苦



終日吮口不顧利害。逢經曰：傳云：孔父正色而立於朝，則人莫敢過而致難於其君者。吾海瀕男子奕世承恩，恨無可報稱。目此狗鼠輩，并髦至尊，豈忍箝口不言。甘同寒蟬，聞者心折。丙戌秋，披緇入山，廬於臨安君墓下。除夕賦詩一字一淚。丁亥秋，起原官，兼監軍監察御史。斯日義旅鱗疊，皆烏合未經訓練，非韓淮陰難以驅戰。逢經猶朝夕兢，兢忠勇奮發。至戊子夏，局又壞，大衆奔竄。逢經曰：吾天朝近臣，不敢草草，舁籃輿抵松下，將渡海，防踈溺于水。卒宗子林日昂，僱人撈尸，難踪跡。是夜夢逢經，面目無異，含笑語曰：吾已歸溥中矣。及旦，步水濱，信然。為殯殮設祭。逢經屬漳浦門下士詩文，被賞鑒。凡漳浦著述家中皆有副本。早歲習帖括，便有天下已任志。當啓禎年，見任用非人，輒鬱鬱憂見眉睫。或聞正人死疆場，殉王事，則對客引滿樂陶。若親見從來月旦，只目逢經為淹博弘才，孰知其一。



腔熱血迴出類萃惜未展施行遂所志

陳達字克亨長樂江田人家望族大父訐謨萬曆辛丑進  
士官布政司叅政父作肅邑庠生性渾樸布衣蔬食遠近  
稱其長者達個儻有才早歲入泮宮即受知於董恭介崇  
禎丁丑年陳聖泰程坤二人負時名不謹口舌莫須有為  
人所中督學新任執法禍叵測平日與聖泰坤談心評文  
稱密交者概裹足恐波及達竭力周旋不避強禦尋陳程

事得白達以此名聞當時乙酉歲領恩貢廷試欽授鴻臚  
寺鳴贊旋遷御贊蓋特設以示寵異前乎此未有也頃之  
陞錦衣衛經歷丙戌秋削髮為僧別字八水取鄭所南思  
肖意終日探陟名勝翻口物外丁亥年起兵部職方司郎  
中陞鴻臚正卿當監國駐江許百九草昧泉南秉鈞達視  
蔑如侃口持正議不亢不阿勢終不振翠華遠幸達退居  
窮島備嘗甘苦或勸歸江田祖里薄田尚堪資給何為空



貞苦節達歎曰尊諭良是。今我雖饗殮不足完服。猶昔日濟濟况肢體髮膚受之父母。若改絃易轍作溫飽計。不特無面目見人。亦何以慰祖先冥口中。竟卒島上。

論曰。治進亂退。固為人之正理。不幸身遭否運。一旦神州陸沉。山川無色。若董陳張嚴諸公。無可柰何。棲身方外。不特淒風苦雨。難以舒顏。即先天霽日。誰堪告語。較之行吟痛哭。殆百倍其苦也。於戲。鴻漸于遠。其羽可用為儀。豈可與彥回可道輩同日而語哉。



劉若傳

劉若，惠安人也。父佑，中乙榜，官潮州府學教授。若幼不凡，長博通經史，子籍才藻絕倫，垂髫遊泮宮，食廩饌，黃石齋何鏡山二先輩見其文，輒讚不容口，惜數奇。丙戌秋闈畢，稟父母入黃蘗山削髮受戒，法名超弘。字如幻，趙介存奉百金備出世資，辭曰：「出家人四大亦非我。」有安用此為？往雪峯依亘和尚，亘叢林數百衆，獨與如幻有忘言契，勤力焚脩，洞燭禪理。亘居泉之招慶，延福上之芙蓉，慶城追隨十餘年，歷書記、掌西堂，精參默究，日躋闡奧。亘和尚知時已至，付以衣戒及拂，如幻辭不獲，頂禮拜受，告歸泉州杖笠飄然，探歷名勝。久之，嗣法席於靈應，資糧不足，領徒衆，託鉢至乙巳，諸檀那延住楊梅山雪峯院。如幻曰：「此真覺祖師卓錫故址，殊可安身，偕衲子十餘人，立住山，規範闡發宗旨，不屑捧喝風套。」本山殿閣年久日漸傾頽，戊申春仲。



募緣重修規模迥異向日時石鼓為霖和尚請以紫雲戒  
壇為如幻出世地秘質公給諫暨通郡善信僉將順堅辭  
不往遠近皈依者日盛如幻覺年高俸酬應善士蘇爾源  
為覓高岡幽邃離院二里許名惠泉石蹟重構精舍供養  
自是如幻棲遲兩禪室不復下山次年春二月中浣命匠  
豫建塔又作龕以便茶毘至冬十月初旬抱微恙徒眾請  
進參苓不允過速知交聚首數朝夕合十跌坐而暝初丙  
戌時若年纔強仕父母在堂妻子繞膝出家後年一再歸  
省侍迨雙親謝世服喪卜兆畢足跡永不到家即屬續際  
男士拔自息安奔赴惟告以勤讀書為正人勿墜家聲不  
他及

論曰男子處世唯高明者方能通權達變如大將用兵正  
合奇勝無所不可故曰權者反於經而後有善也今劉若  
庠序中異才一旦舉目有河山之異粹心沙門登峰造極



匪直瞿曇老子應虛一席即檀星門下亦稱有人

黄石吳陳歐鄢傳

黃見泰字士必福清縣人少攻苦敦節行崇禎庚午舉於鄉時值承平無論省會郡縣為孝廉者上臺敬禮資用殷足輿馬服飾僕從赫奕獨見泰飭躬自守淡泊恬退不屑染於流俗數困南宮不介意安貧肄業耳不聞外事為當事所器隆武元年姓名屢形薦剡官國子監博士屢上封事皆言人所不敢言上知其忠蓋但無可知何輒留中見



秦鬱鬱不自得。即掛冠歸。丙戌秋。士大夫濟濟率納款甚  
至。有覲非道富貴者。見秦聞而嘆曰。是尚可謂有人心乎。  
遂削髮。時逃禪者咸僧帽緇服。見秦慕龔壯丰采素冠。終  
其身不談時事。不見顯者。六籍自給。脫粟充虛。雖家庭未  
見其喜愠之色。後卒於家。

石鏡。福清人也。字可日。生十歲而孤。有志向學。寡母徐氏  
賢。紡績資以成立。弱冠補侯邑弟子員。食廩餼。乙酉。隆武

元年。應本學恩貢。廷試授翰林院萃士。服色同庶吉士。時  
江北無一片乾淨土。南都浙江湖廣江西函信日聞。閩中  
局寢不支。人或言及鏡。怒髮上指。告曰。我二祖開天闢地。  
驅殘元。兩儀煥乎重光。事上高出百王。繼而聖聖相承。仁  
宣孝三宗。仁厚英明。尤遠超前古。若論國祚商周。宜過商  
周。綿永孰意。一旦淪胥至此。豈真夢上之天。不可復問耶。  
君輩固不敢知。吾自有退步。斷不至虧體。乎。以負所學。



抵丙戌秋攜眷歸故里江陰祝髮同沙門披徒資朝夕終日與人子言孝與人臣言忠偕同志為方外遊山巔水涯靡不窮其杖履飲酒賦詩待時偶染腰疾荒村屢治不效親故贈遺不受著汚草見志兀歷六寒暑客至則留有招必赴或杖或輿興致飄兀莫測其際甲午春三月臨危始浩嘆曰此身應死久矣自丙戌以後何不可捐所以隱忍至今尚不能忘此殘喘者以堂上有垂白老母故也於今已矣含笑口喃喃誦南華經以卒

吳楷字子方閩縣人性端嚴喜誦讀名聲籍籍蠻序中雖同社密交對之咸凜然丙戌秋退居鼓山麓朋儕以其貧積餼當貢咸勸稍委蛇得一官免困苦楷嘆曰吾見世人終日皇皇不復知有羞恥事但為一身溫飽計孰知名義至重豐嗇總身外物且吾常奉教於君子矣讀易有年豈不聞見險而止耶遂圓頂為僧次年丁亥我旅遍林邱有



僧號石田浙東人擁兵數萬營近鼓山人吳玠犯楷視之  
蔑如次年烽火息巍然安節足迹不進城郭往來盡厲聲  
氣對敵雄談登峯臨流鮮倦容若寡廉鮮恥脂韋勢利輩  
同座不屑交一語其妻某氏諳義理偕隱甘淡泊簞瓢茅  
屋怡然自得終其身

陳希友字孝廉長樂江田里人先代則安時憲錠洙科第  
四世蟬聯至洙官太常正卿居省城子孫因家焉希友其

曾孫也博學能文章雖諸生負重名丙戌秋七月歸居祖  
里丁亥秋魯藩監國以薦預考選特授兵科給事中數建  
言不為權貴懼次年戊子夏局又改希友歸祝髮同時負  
氣節為僧者多向食獨希友終身茹素只不戒酒無薄田  
可耕薪米悉出胞弟希參供給然希友天性豪爽對客浮  
白賦咏窮晝夜後為楚世子成治株連逮至廣東人勸易

僧服晦宦蹟尚可保全希友曰吾世沐國恩此身瑣闥豈



容顛沛毀素履且令張陸笑人不屈卒於獄一生牢落不平之氣無可告語恒藉筆端發洩同郡高子翼字本舉時官廣城貧無長物自希友到日資給病時參苓及歿後棺衾一概賴其捐俸

歐琪字全甫候官人本縣諸生出身孤寒博舉弘才貌寢而志雄結交多豪士丙戌後抗節萬山中被獲守以弁兵未幾得逸出詣福清縣黃蘗古剎依隱元和尚圓頂為僧一日有人山行遇諸逆旅笑言竟日臨別告曰為我語林暢善清明重九勿吝隻鷄尊酒奠吾先人墳前足見師弟之誼如此而已後卒於都督謝鼎舟中

鄔正衡字阿平永福人縣之山川峻峭多產異才遠不具論入明以來前輩黃文煥張世堪林弘祖諸公皆能文章名當世正衡即正畿母弟宿學長才在庠序名與正畿亦相伯仲同產者五正畿正重正某先後死國正衡作三愚



合傳癸卯年正衡以餼序當本學歲貢學道試亟正衡  
強赴領卷至亭午無文字書卷上云青史不可沒忠孝本  
吾心時督學係舊人尚重名義憐不校自此削髮稱頭陀  
法名止行精舍幽峻松檜插天瀑布無停流莫辨冬夏賦  
咏信筆直書無草稿如是終餘年

論曰世人自童年入學至皓首窮經異博一第圖富貴其  
於聖賢大道義大倫常畢生憤々若何可勝計若黃石吳  
陳歐鄔諸公一介儒生能守所志確乎不可拔方可謂真  
讀書孔子徒



陳鄭傳

陳兆藩字衛公。候官人也。生望族。大父夢龍。乙榜官。合浦知縣。一門期功。強半入仕籍。兆藩獨貧。攻苦。匪豐。嗇動心。崇禎己卯。以春秋掇鄉試。主考劉理順。吳甘來。房考夏允彝。國變。皆死節。庚辰癸未。兆藩兩中南宮副榜。乙酉夏。福州改元。官刑部主事。晉本司員外郎。丁亥。改福建道監察御史。有亟旌死節諸臣。及恢復機。且疏。一時傳誦。戊子。後屏迹衡門。見里中有致身通顯。鳴得意者。兆藩笑曰。我累世承恩。復官侍御。非此輩比。脫我見金夫。而不有躬。不過圖半生溫飽。何以慰祖父。及吾師在天之靈。故一意苦節。文史自業。舉人世寵辱榮枯。若浮雲過太虛。遇清風朗月。焚香煮茗。對客抗談。今古節裂。年逾杖國。強徒猶過少壯。辛酉季秋。抱微疴。不服藥餌。語少子啓夔曰。今而後。吾得為大明完人矣。含笑卒。享壽七十六。家婦杜氏。尚書嫌。



曾孫女也。孀居三十餘年。布衣蔬食。夫翁謝世。治喪葬如禮。兼營先世寔。資郎叔啓夔肆業。皆一生勤儉所積云。

陳鳴石字體魁。長樂縣人。奕葉仕宦。族衆繁盛。習俗少鄙。魯風。鳴石獨甘恬淡。嚴捺守。登崇禎癸酉鄉榜。次年會場落副車。還里。益奮力下帷。逢甲申乙酉大變。恒言我朝事。事度越前代。明王不下六七作。不幸天降喪降。亂西北方。連年荒旱。逆闖輩緣以竊發。竟致海宇崩裂。如此吾真不知其解。丁亥秋。以端方特授禮科給事中。鳴石正色立朝。猶見漢官威儀。戊子後。杜門掃軌。闔闔不復見其踪跡。卽里閭中非素心者。招鮮赴。教子弟依禮法。磐桓林丘三十餘年。庚申秋七月卒。壽八十四。初丙戌秋。貪仕進者多隨征。前孝廉恒公車北上。習俗淺見。間有謔言。微中者鳴石笑曰。吾雖生值叔世。豈真視富貴重於綱常耶。舉人思捷南宮者。固不足挂齒牙間。卽宦裔不諳大義。異他歧圖進。



身不特天地痛絕。祖先冥<sub>二</sub>中。不無怨恫。後官粵東者十  
不一二存。皆如所言。

鄭允成。長樂人也。字祖謙。大父岳。進士。歷官吏。刑左右。給  
事中。雲南布政司叅政。父彥。大學生。沉酣經史。允成謹樸。  
舉止迥異。統<sub>二</sub>禔年二十四。天啓丁卯。舉於鄉。數困公車。恬  
靜自守。邑令鄭尚友。夏允彝。居官廉正。少許。可獨與允成  
交厚。允成終<sub>二</sub>二公任。未嘗一言及私。乙酉。福州改元。惟時

甲乙榜。及有力者。多入仕籍。允成父彥。見糧餉不足。捐資  
樂助。據例應授美職。允成曰。國家多難。有能者効力。有財  
者輸金。臣子分所當然。我朝三百年深仁厚澤。一旦決裂。  
至此。凡有血性者。當如何。卧薪嘗膽。枕戈待旦。吾海瀕男  
子。讀聖賢書。豈可掩吾父義舉。博一官耶。戊子。後年僅逾  
四十。竟反心進取。初喜內典。久之棄不談。一意理學。由程  
朱周邵。上溯孔孟。履穿衣百結。俗咸王湛目之。允成夷然。



匪介意所往來皆氣節及方外士浮沉人世鬱不自得  
丁巳嘉平月下浣抱恙卒年七十四臨屬纊強起呼諸子  
曰吾死有遺恨銘旌只書前孝廉三字足矣始瞑

論曰昔薛方對使者云堯舜在上下有巢由固屬滑稽詞  
婉而峻斂德不為所汙謝朓當宋齊易代之際頗稱堅勇  
後復未聞遠舉由是豈見節之未可輕言詩不云乎靡不  
有初鮮克有終觀陳兆藩陳鳴石鄭允成畢生能介于石  
可不謂難歟嗚呼作中流之砥柱迴狂瀾于既倒舍斯人  
其誰與歸



張鄭崔林黃薛梁傳

張綸字道羽。閩縣人也。方正長厚。器度汪汪。從幼名能文。年十五。督學譚昌言。校本府。取閩縣首名。入泮宮。次年取本學第二名。食廩餼。歷受知當事。棘闈久不售。未常幾微。見言色。歲乙酉。以本學恩貢試大廷。御批真實經濟可措施行。允屬董賈流亞。授國子監博士。太學中一時奉若闕。西伯起丙戌後。年甫強仕。即杜門掃軌。匪特進取念絕。時事竟不挂齒。類奉親教子。外祗肆力。殘編斷簡。氣溫色和。里中稱邵康節再見。至若理義所在。雖貧有莫能奪。居父母喪。哀毀骨立。鬚髮易玄。為白。三年服闋。猶不如酒肉。長素終其身。租粒原足自給。兵荒後。頑佃拖欠過半。寧損己節用。不肯治之以法。族有匪人。酗酒觸犯者。屢唯以不能化。誨責躬。終不與校。初為諸生時。積餼金二十年。置田若干畝。供宗祠祭祀。外周族人不足者。嘉言懿行。難罄述。至



子觀光已成進士服食節儉一毫未改儒素以丙辰仲冬  
抱微恙謝人世年七十有四族鄰痛悼不啻所生先是析  
產時兄弟三人季者出承繼例不應受本生家業論堅持  
不可竟作三分平分又田有上下則園廬瘠不等論閱闔  
書甘受低下者將膏腴讓於弟縉以昔禦外侮縉竭力為  
多人咸多焉卜先人宅兆將成堪輿家云此地固吉唯不  
利長房親友僉欲另覓論曰僅不利長房次房三房皆吉  
何妨若必擇三房俱利親柩停至何時葬後亦不甚驗生  
平著述尤富善韜藏士論服之

鄭郊字牧仲莆田縣人大王父敬道乙榜任河源知縣大  
父茂嘉靖癸丑進士令海鹽破倭擢兵科歷吏禮左右戶  
科都給事忤嚴嵩出為叅政河南按察使父涇都指揮僉  
事郊弱冠入泮宮遂食餼乙酉年三十四與弟郊同榜恩  
貢初工制藝未愜意潛心理學兼經史百家言詩文名重



一時雲間夏允彝知長樂縣與郊文字契恨相見晚遊漳浦門為罷重隆武元年漳浦入朝與左都何楷均謂牧仲才學擅長宜官詞林不則讀中秘書庶公論允愜郊傷政柄下移時事日非力辭歸田丙丁後脩壺麓祖祠棲身肆力墳典叅究周易自皇極屆卦爻象數據所見立言凡五年而明易書成傷王綱不振宗社為墟依正統論起自唐虞下至宋元取舊史更定論斷期不悖乎朱子通鑑綱目又七年而史統書成悲時事多艱世人向背少定見作寓騷以寄意烽火頻仍平定難期恐子姓將來無可稽考作家傳及見聞錄永書折衡雜書著共若干卷詩歌若干卷數十年間遷徙無常鮮有定處凡此皆出艱辛萬狀支離困苦中得之卒於壬戌夏四月年七十有一

崔相候官人也字介臣本縣庠生廉隅自守舌耕外別無經營以長尺寸乙酉福州改元相與林阿臯張道羽輩號



十義士特賜恩貢官莘士丁亥秋擢翰林院編脩監國時  
形同草昧權要秉鈞相鑒閣部熊汝霖義興侯鄭尊謙俱  
死非命持已清慎立群邪間不惡而嚴戊子後相飄然島  
外逃於麴蘖每當酒酣耳熱花前月下將一片熱衷發為  
詩歌以見志後卒於福清海壇山年僅躋下壽

林大乾字用始長樂人也大王父廷選官兵部尚書大乾  
本府庠生喜讀書能文旁及騎射美鬚髯狀貌魁梧性骯

髒兼以詆諧結立社文起二會李元仲林守一張道羽輩  
咸一時名流崇禎壬午棘闈中落副榜悵不售即僑本年  
武場同儕赴賀大乾掀髯嘆曰吾文士也造物吝我一第  
世受皇恩圖報念切安能鬱口待黃河之清借此為進身  
階非得已何賀為乙酉以薦授都察院經歷會太常少卿  
嚴通奉肯視師浙江戒行有期而難其副在廷僉謂嚴奉  
常北行事闕宗社副使非林用始不可大乾慨然束裝就



道一路叅贊事合機宜卒不辱命而回有志未展歸居竹  
田祖里丁亥署羅源縣事潔己字民雖軍興旁午正供外  
一毫不擾聽政之暇浮白談文頃之陞兵部職方司主事  
迨監國揚帆痛哭以歸棲遲泉石衡泌樂飢不聞時事後  
數年卒

黃士尊字子舉候官瀛州人居省城本縣諸生食廩餼文  
行與閩縣張綸稱叔世絕倫但士尊家稍殷好施與親友

有急扣門易如取携常出腴田二百畝周鄉閭若族人待  
以舉火者尤難枚舉乙酉積籩應本學恩貢未官覩時事  
日非揭甲春歸祖里丁亥秋八閩到處兵起省會城門晝閉  
斗米千錢外縣及村落價僅減半民不聊生親朋奔投者  
不啻歸市士尊梳接應不倦倉廩為空尚別移以給一時  
得免死溝壑者殊衆平生交多聲氣與吏部林塗尤厚共  
硯席五六年及聞塗死疆場同輩有嘆惜出涕者士尊曰



昔馬新息羨馬革裹尸為盛事今子野以身報國得死所  
大丈夫事何必效兒女子痛悼為士尊博學無所不及尤  
酷嗜周易亂後閉戶猶終日莊誦不綴後卒于家今子弟  
貧無所立錐地負官糧困縲紲竟無一人過而問者

薛敬孟字子熙福清人也弱冠入泮宮食廩餼崇禎末年  
督學吳之屏郭之奇校士稱得人敬孟先後俱冠軍有志  
未售乙酉充本縣學恩貢對策稱旨欽授萃士丁亥年擢

兵部主事戊子後授徒講業每對客曰人生窮達固自有  
命吾從幼攻苦不料天步艱難無由入青雲報國榮宗猶  
得攬子史采精華拈韻賦詩度此永日乃知士生晚近未  
始非幸也柰烽烟連年兵戈未解出遊山陰又之張秋真  
定覽名山大川孰知二豎已乘其隙竟以甲寅正月卒于  
恒山年僅六十著有擊鐵集

林廸字惠子閩縣人也父先春天啓乙丑進士官浙江嘉



善知縣抑強扶弱作興士類寒素莫不頌德時吏科都給  
事魏大中被魏忠賢陷死尚誣贓三千兩行縣追比先春  
憫其廉官一貧如洗為之委曲設法得完後竟以忤權要  
賁于邱園廸自幼負奇嗜古弱冠補弟子員食餼乙酉年  
充本學恩貢候選丙戌後屏迹掃軌講業授徒蓬華樂飢  
怡然自得博綜墳典蘊忠孝大旨著有杞窓讀史及秋咏  
等詩歲己酉疾革正襟危坐語友人曰吾輩不幸生於末俗  
不必大用於天下只期無媿於天下非義富貴豈足以動  
有志士哉并未言及後事而卒

梁春暉字時皇長樂人也本縣庠生品端氣和授徒代耕  
乙酉領恩貢戊子後即杜門不出理前業從遊者衆年杖  
鄉猶講論不輟終其身子珪字志玄能讀父書年十五補  
弟子員食廩餼詞章拔萃文雅有器識方逾弱冠領乙酉  
恩貢戊子後隱祖里繩世業珪固雄於文乎體弱不勝衣



至與人談忠孝節烈事不啻口如懸河望而知其學問德  
器久之北遊齊魯燕趙恒酒後揮毫寫其牢落不平之氣  
遇人開心見誠無所隱年未及中壽卒

論曰人方屈首受書莫不黑白分明邪正洞若觀火洎乎  
勢利薰心多昧進退存亡之義今張鄭林黃數君或長厚  
純正或慷慨俠烈厄遭陽九俱能守不字之貞豈非鐵中  
錚錚末俗偉人歟使其生值盛時立朝為政固未可知但  
曲學阿世吾知免夫



方陳游孫謝王邵萍傳

方潤字具蒙。閩縣諸生。喜讀書談論。用儕咸樂親近。雖舌耕自給。常有不可一世之致。當隆武二年丙戌。時事日非。翻刻鐵函晞髮兩集。序文有踏殺陰山之草。鋪平遼水之流語。見者膽落。頃之閩中局解。友人為燬其板。潤付一笑。痛國運不振。置身物外。教生徒如舊章。常語同人。昔馬融才學固堪為人北面。惜制行不堅。依權貴取官爵。又在位貪濁。毫無撻守。吾不知其生平所通何經。適足為舉比羞。故潤雖布衣蔬食。胸次磊落。泰然自適。先是江西鉛山縣丁丑進士胡夢泰。官兵科給事中。承召赴行。在畫節於延平府。因大水。棺漂至候官江。許為人所收。胡家僕同一僧至。靳不付。運回停荒村。被賊斧破。潤同王訪箕莊。以浚楊觀。陳發曾醮金換柩。卜葬鼓山積翠庵。通郡至今傳為盛事。後至辛酉秋八月卒。得壽七十七。



陳匡生，閩縣人也。字廬子。本學諸生。高祖紀進士。歷任由  
侍郎。至都御史。弘正朝。以廉介名。匡生博覽多才。尤重聲  
氣。然諾不苟。每佳辰美景，浮白雄談。見地恒出人意。表隆  
武元年秋八月。慷慨上封事。淋漓剴切。在廷壯之。丙戌後。  
謝舉子業。遍歷島外。及廣東濱海諸處。席不暇煖。無非悲  
國事。傾移。憑三寸舌。遊說各藩鎮。一片熱衷。人咸敬而禮  
之。丙申秋。歸自粵東。知大厦非一木能支。囊剝資斧。希作  
入山計。遠海氛造。廬席捲一空。見者皆為扼腕。匡生笑曰。  
吾先世蒙恩。今國破家亡。窮困以死也。固宜。茲稍足自潤。  
中造物所忌。假手奪去。又何足介意。聞者服焉。自此年近  
知非。憚于遠出。落落不得志。卒於家。匡生平日著述不少。  
詩文暨雜著。各有集。經烽火連年。遷徙無定居。大率為人  
竊去。子弟莫敢踏蹤。竟未有存者。輿論惜之。

游文熊字熊非。連江縣諸生。為人骯髒。不屑與流俗伍。丙



戎方壯年棄舉子業。遁跡海外。匪家室。係念其兄。拘儒屢  
託人勸駕歸鄉。文熊曰。吾血性丈夫。向奉教於君子。假令  
鬢髮易服。復作措大。踟躕若棘下駒。亦何面目。隨衆立宮  
墻廊廡下。幸告吾兄。人各有志。難相強。時友某建義旗。紉  
綉。不耐勞苦。文熊力肩其任。凡練兵措餉。料敵制勝。外交  
諸藩鎮。內接應賓客。事無巨細。盤根錯節。一一概為經畫。  
乙未夏五。無病以醉卒於閩縣琅崎里。後某孤軍難立。好  
義不終。未幾得擁節恒山。轄地既廣。所屬府州縣。殊多居  
養。威儀赫奕。非南土比。閩中時連歲兵燹。仰濡沫。集其治  
者如雲。某亦沾沾自喜。鳴得意。前後竟作兩截人。予每見  
嘆曰。使游文熊尚在此。君亦不至此。

孫學稼。字君實。候官人也。大父承謨。萬曆癸未進士官。崇  
德知縣。父昌裔。萬曆庚戌進士官。浙江提學副使。學稼承  
世祿。又屬晚子。父母重若珠璧。而攻苦提躬。尤過於寒素。



幼時讀胡銓上高宗封事拍案狂號業師鄧壽用稱醇儒  
訝而問之學稼曰恨不生當其時手刃逆檣歎施全鹵莽  
垂髫補弟子員食廩餼學稼方習制藝其於經史子籍莫  
不博綜融貫一時罕有其匹歲乙酉福州改元宦後強半  
垂紳措笏學稼獨不以為意祇嘆世受國恩隆天重地坐  
視兩京淪沒不能一死報國為羞丙戌秋閩局不支遂匿  
跡長樂三溪里取其山川明秀且考亭曾遊處也歷丁亥  
戊子兩載會城以外到處皆兵雖名義舉而殘賊村郭無  
醉飽心民皆重足而立時監國行在江干通籍者比戶學  
稼澗靜自守杜門掃軌客至煮茗設文而已方戊子春斗  
米千錢學稼旅次無長物猶罄囊橐脫友人於厄洎己丑  
家山稍可駐足棄舉子業屏迹衡門篇簡樂飢久之念龍  
門歷覽名山大川文益竒壯遂飄然杖屨由吳楚齊魯以  
及燕趙秦晉所至莫不倒屣恐後自是踪跡十九在外間



歲歸一省母而已。悲烽火頻仍，賦役煩數，編十六國年表，繫以論四卷，憫人心不古，正議難入，集群言彙抄四十卷，又備遺日抄，并所著蘭雪軒集各三十卷，君實行方而氣和，學稱博洽，述作典雅，予向心服，迨予浪遊恒山，留都武林，携手促膝，殊久，恒花前月下，縱談今古，酒酣以往，不減昔人相樂也。已而相泣，旁若無人之致，庚申春初，慈溪縣與予分手，馬首北向，自此音問間隔，竟以次年辛酉重九卒於懷慶府僧舍。

謝宮錦字珂臣，甌寧諸生，秉賦剛毅，行誼必軌於正，勤誦讀，有才藻，甫弱冠，印名聲籍甚，歷受知於督學暨諸當事，延見間指陳悉地方利病，未常一言及私，然非公不至，益為上臺器重。歲癸未，建土苦旱，道府縣官百計祈禱，不應，宮錦具詞焚梨嶽廟，雨立沾足，常言士人品行為一身先務，若才學經濟，譬閨閣中女紅，祇本等事，脫使婦人帷薄不



循舉動無檢專誇針線之工中饋之潔顧不謬歟甲申歲  
聞變歎曰今時勢易卦天山候也遯尾則厲攜眷歸祖里  
陽墩故第丙戌後謝絕舉業幅巾芒鞋日徜徉於清泉竒  
峯所居精舍幽峻朝夕吟嘯與山谷相應至庚寅秋杪竟  
賁志卒宮錦詩文典則著述甚富烽火連年不絕多散失  
十僅存二三云

王繼褒字洞簫候官諸生好學有才兼貫通釋典嚴交遊  
士論重之變革後方壯年即棄青衿不面貴顯常言從來  
統議衆矣獨方正學謂三代以下惟漢唐宋及我明為正  
統若篡弑女后亂華皆屬變統猶詩有變風變雅立言俊  
偉可謂發前人所未發夫宋積弱徽欽以下遠徙南服有  
臣無君不足復道漢遭王莽中厄光武崛起徒步揭還故  
鼎唐變遭安史肅宗即位靈武任李郭恢舊業俱延數百  
年宗社况昭代凡事遠過漢唐斷無中絕之理矧漳浦易



數方駕康節載在簡篇者屢祇恐天不假年弗及重見漢  
官威儀也豈不痛哉無奈浮沉人間對同志則引滿談心  
爰及秘笈內典即逢俗子亦未常立異後沾微恙卒僅躋  
下壽去今二十餘年同儕言及猶重為悼惜繼褒詩文雅  
馴著有代曆漫草若干卷

王珽字子玉長樂五都人家中習俗強悍獨珽從幼文雅  
向學垂髫遊泮宮風度弱不勝衣剛大之氣雖威武不為  
屈丙戌年纔逾弱冠卜築山居絕迹鄉市耕稼自業數椽  
僅蔽風雨晨昏誦讀不倦流俗見之亦知起敬非言不敢  
出口偶歲稔逋正供被拘到縣庭受鞭責有訝而癡之者  
珽曰吾向黌序中人近恥赴試學冊無名則平民也今匪  
人雖被箠何足為辱且自變革以來諸生不能自保其身  
者比比皆是否則不列倡之下丐之上也聞者多之未幾  
卒於虎遠近咸謂天道不可知



邵璋字長似候官人也。本府庠生。璋為孝廉。景文胞弟。事親孝。奉兄嫂若嚴君。食貧教生徒。門下所成就殊衆。丙戌時。與從子弼勛並壯年。謝子衿卜居山僻。舌耕自給。朝夕孜孜。制藝或疑所習非急務。璋曰。吾身雖隱。不可負人子弟託。且待黃河之清。逢勢利脂葺葺。輒昏。欲睡。或同志過從。及野老方外士。則煮酒焚香。談天寶遺事。交友以誠。不設城府。後卒於尤溪縣。

薛銓字穆生。莆田人。幼從父遷居會城。遊候官泮宮。為人恬靜寡言笑。至談忠孝節烈事。常媿。不倦。舉業餘力窮神字學。精篆刻。丙戌時。年尚未強。仕飄然。市隱不復談及舉業。尚心古昔篆文。海內稱其圖章鮮匹。求者不甚計利。故造請無虛日。戶外趾蓋相錯。竟以此終餘年。方銓列肆於市。博綜從古名手。棄魏晉。取名漢燈。以示己志。福清薛鎔託僧名作序表揚。見南窓草存。銓平日奉親唯謹。娶妾。



陳氏值姑病割股救痊洵末俗所難

陳顯謨字龍見晉江諸生學宗程朱慷慨有大節甲申年

聞三月十九闖逆陷京師大行死社稷謨整衣冠辭

聖廟口占粘明倫堂東壁有食者國之粟衣者朝制服不

能乞糧師祇同申痛哭區區草莽臣赴義從冥漠句即解

所繫縲投縲于鐘架教官聞而趨解氣移時始續顯謨裂

背言曰吾力薄不能寸磔闖賊吐吾氣將一死謝先帝併

以媿天下後世為臣不忠者君之救我是誠何心與歸家

人防護弗遂所志杜門不出終其身

論曰常讀史至費貽任永范策父子能自愛鼎余以為高

于張禹胡廣日糜木倉粟也遠甚今方潤陳匡生諸君嘆

河山改色沉淪草澤邈世無悶豈非庠序中空谷足音歟

故備詳生平大節未敢草口嗚呼記魯論者不遺逸民夫

豈徒然



鄔廷誨傳

鄔廷誨字靖獻永福縣人嘉靖年死後難東橋先生曾孫也從幼力學雖起孤寒為諸生授徒講學性慷慨匪邊幅介懷金錢到手立盡非復措大舉止量最高飲多不亂表中表黃維章太史宰山陽日折簡敦請廷誨重卻其意改涉抵署祇與談文論古煮茗焚香將兩月未常一言他及維章嘆曰鄔君真名士媿吾五斗折腰孰意其高至此哉捐俸百金以贈廷誨沿途盡買書籍歸裝并無所留生平豪興多此類崇禎庚辰歲貢進京廷試欽賜進士選登封縣尹當日中州荒旱民不聊生廷誨蒞任極力撫字減刑興學奸猾斂迹草竊逃遁通邑有再生之謠頃之流寇蔓延遍江以北警報沓至廷誨坐學宮語士民予一介



書生奉

天子命來守此土安敢貳心以負所學脫使力

若不敵一死上報國恩夫復何疑闔縣欣然以固圍為勝  
策迨寇衆蜂至一望無際復念賊令敢與抗者縣破屠城  
吾身固不遑恤柰斯民何張許二公睢陽可鏡諭士民槩  
逃山谷單騎詣賊壘告曰不降者只縣令一人外此無涉  
吾今捐軀為百姓請命遂伏劍死賊救無及垂涕羅拜匝  
地即傳示鄆老爺英烈如許各營兵目不許犯其人民流  
寇平日殺人奚啻草菅獨登封一縣賴以得全民戴其德  
殞殮藁葬歲時俎豆阻寇盜載途末由入告故未沐恤典  
久之長洲縣張堦宰登封更為卜兆立碑方聞遠近故走  
得濡毫為傳其略

論曰嘉靖末年倭犯內地慘酷異常鄆東橋不過一布衣  
操戈冲其鋒乃殺身成仁蒙 旨褒旌春秋俎豆間氣所

鍾孫曾濟也余既為兵科正畿明經正衡表揚矣茲又得



聞大令廷誨事慷慨激烈能不濡毫以述何鄭鄆氏之多  
賢乎謂非鄆東橋之貽厥孫謀不可

### 李世熊傳

李世熊字元仲寧化縣泉上人。力學勵行。垂髫補弟子員。  
食餼辛酉歲大比。世熊方弱冠。房考興化府司李余昌稱  
得卷。擊節嘆賞。因爭元於大考官。不得。遂袖卷退。是科僅  
中副榜。世熊毫無介意。益博極經史。大肆力於文章。歷考  
咸冠軍。當日天下莫不知寧化縣有李世熊者。凡典試求  
闈者。皆願得物色李生。為棘闈光。孰意竟慳一第。當世  
僅以其才也。然世熊禔躬方巖處。家庭孝友。交朋友信義。  
則又似視雕蟲為末技。歲乙酉。天興以元序應恩貢。以病  
力辭。在廷交薦。世熊堅卧不起。未幾改革。世熊遂杜門掃  
軌。足迹不入城市。時有諛於汀州鎮將者。以其心懷叵測。  
親知僉從。謂止造門一見。立可永解。世熊作書以答畧云。



甲申以來雖名掛學冊。儒巾儒衫。久不可問。今得解條釋縛。正如鹿返長林。若復伏謁強顏。則戕性剝心。何殊殺戮。古來處士。舍醜飲刃者。史冊相望。僕年已四十八。去諸葛瘁躬日。僅少一年。視文山畫節時。已多一載。請為婉謝云。云鎮將固武人。庶世熊家清望重。不敢孟浪。侵加。從是長日。祇與管城墨。卿作緣。交盡方外。非聲氣中。欲觀眉宇。亦不可得。常言昔黃叔度。徐孺子。管寧。薛方。諸君子。非不知肥馬輕裘。建功立業。為盛事。苟非其時。則官爵與節義。輕重判若白黑。况名教中。自有樂地。往口甘貧賤。而匪悔。此確有所見。非苟焉而已也。丁亥戊子後。綠林遙起。世熊集泉上。人民築堡以居。凡經過者。相戒勿犯。則平日之誠能動物。可以概見。優悠暮景。竟以丙寅。菊月下浣。謝世。享壽八十有五。生平著述最富。如寒枝初集。二集。狗馬史記。錢神論。晚年脩寧化縣志。強半未付剞劂。將來與鐵函晞髮。



傳是使忠臣義士處平處亂無一可省也可不為大哀哉  
青門老人所著節義錄細心考訂強半出於闡人闡事余  
讀之喜其詳而猶悲其世之若此類而名湮沒者何可勝  
數然使是編傳世則是青門以其所見聞孜孜不敢怠天  
下有心人如青門者慮亦不少亦各以其所見聞孜孜不  
敢怠則誅奸佞於既往發潛德之幽光庶幾緒風縹影長  
在人間使卒有明也不亦善乎青門為謝在杭先生季子  
先生名山著作海內知名固知太史之有子長叔皮之有  
孟堅家學淵源為異日史錄之光吾服青門翁之志蓋深  
遠矣



接卷一  
五章  
黃信  
付後  
十一  
記  
十一  
吉  
出

林全春字白門福清縣人

生 遇事不憚盤錯 乙酉春

以益紀推官署篆贛縣時

綠林賊治豪奴巨憇強半

受賊職銜乘肥張蓋橫里閉

至侵凌官族占產業強納

人子女道路以目有司官不敢問全素蒞任偵知毅然發

憤曰此輩不治安思三尺法為白於督師萬元吉請滅此

然後討賊安民新師壯之全春選白棒數束遊健悍皂快

數十入幕下曰備緩急人共竊笑未幾遣胥吏通殷

願杯酒交歡幸年膏勿卻暨期畢集全去出酒餞款洽席

半閉署門出壁後入亂棧交下盡覽諸座間掃所占產業

子女於各主通縣快其威明加意庇隱政清訟少因圖

中可張雀羅旁寇遠引久之北兵南逼勢若破竹全春督

兵民捍禦贛州 臣下猶介口 循堞雉直至失守從容南

向投縲子曰繼偉先遁出 義勇 復死

孫士遴侯官人也字翊明為布衣孫安石子愛石因貧



行七 杭州及門建書院以待執贄者 林數月問難兼覽

浙名勝而歸從遊雲集 守請 郡城居紫陽學堂終

辯析疑義 經 史籍 訖釋 易 竣事 辛未冬中允

上言 原任中允黃道周建言 護譴 臣恐海內士大

夫化為縲 賜環旋晉諭德崇禎十年夏四月有

旨求言 兵科李 直 獄道周言 陛下方求言而

言者輒斥 方 入獄者旋聞 又蒙 至冬十月

東宮宮屬 焜編脩楊廷麟咸推讓道周閣臣

道周見偏且上 有不 鄭 詔寢之 刑科馮元飈言黃

道周忠足 動聖 金而不得 執政之心 恐後世有以議

得失也不聽 未幾 推少詹事 六年戊寅夏六月兵

尚書楊嗣昌改 部 兼東明太學士 時嗣昌母喪纔五

月先是吏部會推閣員 據詞 負 上命 并在籍

守 日蓋為嗣昌暨陳新甲地也 特召新甲為兵部



侍郎總督宣大 三疏連 一劾內閣楊嗣昌 一劾宣

大總帥 祈甲一叅遼東巡撫方 各云朝廷即乏才

豈無可求定謀者何必破常格以 之人哉上為不

懌乙巳召廷臣于平臺峻詞詰責道周反覆辯論上意道

周以枚卜未預詆 昌道周只持 常名教四字不少

屈上怒謫道周江西布政司都事時翰林劉同升趙士春

都給事何楷試御史林蘭友交章論救語侵嗣只

次年己卯江西巡撫解學龍薦舉人才首稱道周

周黨邪學龍徇私俱逮下獄戶部主事葉廷秀疏請寬假

旨下削籍廷杖繫 三日監生涂 吉上言黃道周通

籍二十年半居墳廬稽古著書一生力學只知君親雖言

常過節 志實忠純今喘息僅存 不輟 臣不為

道周世 為皇上下天下萬世惜也 太宗恨魏徵面折

至欲殺而終不 武帝惡 點直諫雖遠出而實優容



此書與上  
不銜接  
定有缺  
十二日  
斷記

三道周朝見後慨事權旁落發憤請督師北行兵弱餉寡

逆料不濟祇憑一腔熱血從戎兵出江西至廣信府遇敵

互有勝敗後值示弱麾下屢勝而驕忽大眾兵馬蜂涌道

周陳敗無援被執時案謂洪文襄也晉江柄兵微服造曰予某人敬問先

生無恙道周佯為不識曰某人盡忠戮力壬午年已死先

皇帝賜祭贈官備載國典汝何人其取竊名字以冀緩頰

晉江見道周心如鐵石難轉移語塞而退未幾遂遇害於

南京同難中書賴總謹字敬儒蔡春溶字時培主事趙士

超字玄卿通判毛至潔字玄水是日天為晝晦觀者數十

萬人莫不嘖嘖歎服道周制行最嚴學極博自少至老手

未釋卷著述甚富易數婉美邵康節嘗細推年歷至崇禎

甲申年止曰數同西周入仕以來夢高皇帝文皇帝及神

廟不一而足剛大之氣百折不回早歲與都御史陳士奇

知府李時興砥礪名節究之三人先後皆死節



論曰國朝恩隆養士故英才特盛開創從龍諸公上天篤  
生以輔翼聖明固也迨夫靖難齊黃方練輩及逋逃不屈  
者濟濟桓桓繼而三楊相業楊文襄智勇薛文清玉潔劉  
文靖謝文正方嚴梁文康之過巷張江陵李文達之弘才  
于忠肅扶危定傾熊芝岡萬里長城王莊毅李襄敏義形  
於色項秦韓三襄毅之戰功王文成文武兼備理學全才劉清惠狷  
介海忠介水清嚴毅鄭端簡博洽王端毅方正周文襄經  
濟劉忠宣愛民如子保躬猶女羅文毅岳文肅不阿楊忠  
愍不畏強禦李獻吉節概才華楊用脩何景明文章楊左  
繆魏周萬輩之忤璫約略言之固足震天動地矣若甲申  
乙酉乾坤大變無論朝野以身殉國者何處蔑有漳浦若  
論雄才偉略未必如于如王如熊要之三百年来節義文  
章則幼玄與浙東倪文正正氣中之正氣男子中之男子  
齊日月而共垂不朽也夫復奚疑



曹胡傳

曾學佺字能始，候官縣人。性聰敏，從幼力學，好古。年十八，中萬曆辛卯鄉試。乙未成進士。所為詩文清峭雋永。遠宗陶謝，近倣儲亨。在里閭，與鄧汝高、觀察徐惟和、孝廉惟起、布衣先大人布政、倡和無虛日。釋褐授戶部主事。己亥年，轉南京大理寺正。晉戶部郎中。分校禮闈，識拔盡名流。留都部務頗簡，日惟賦咏，俸滿陞四川布政司叅政。未幾擢按察使，如飭學政，清黃冊，興利弊，種種便民。緣豪與為俗吏所中，坐以註誤，遂拂衣歸養。至壬戌年，起廣西叅議。尋陞按察司副使。治績韻事不異四川。生平宦轍所至，凡名山勝迹，奇人高士，靡不探陟尋訪，著作隨年。付剞劂時，熹宗幼年踐祚，送璫煽虐，學佺以文字幾罹禍。年僅知非，便掛冠還里。於是一意述作，五經各有箋註，石倉諸集十

二代詩選暨天下名勝志，咸家食所討論。優游巖壑，將二



十年自仕宦洎騷人墨客抵閩中者無弗極仰風度如昔  
過魏郡以未得見劉待制為憾事迨甲申乙酉乾坤震蕩  
福州改元起學佺太常寺少卿轉正陞禮部侍郎掌蘭臺  
館事晉本部尚書旋加官保脩毅廟實錄總裁僅匝歲也  
仙霞失守兵馬溯游而下警報沓至學佺處之裕如適飯  
客含笑語曰何事倉皇朕有不測禮部尚書曹學佺死之  
矣未數日城將下歡然自經屍下先有生前一管筆死後  
一條繩句享壽七十有三方崇禎初年裁草驛遞豫言將  
來必為亂階使天果不祚國老臣盡節毋煩再計學佺晚  
年和易遇事無所可否其再起也老而應命時事陵夷未  
為衆所信服直至見危授命毫無強勉始知贖者固不可  
測

胡上琛字席公先世從太祖定天下有功世襲福州右衛  
百揮使子孫遂為閩縣人上琛四歲失怙母田夫人撫養



成立賦性敏慧通經史韜畧旁及棊棋風流俊逸雅歌投  
壺有祭征回風著武畧軒要行世年十六時赴京襲職過  
易水有一死謝知己丈夫豈所難只今度易水猶恨悞燕  
丹句還初任搃捕事尋檄往沿海繕城堡核戰艦區畫各  
有則當事避之崇禎丙子中武闈鄉榜巡按御史陸清源  
欲特乞用用上琛以非例力辭而止崇禎十六年徵各指  
直官六勤上琛統義勇北會敵退班師回闕未幾南  
北西六相繼失守上琛對朋儕亦嘆息出涕以未獲馬革  
裹尸歎之夫羞乙酉歲唐藩即位福州改元隆武會試天  
下將才上琛蒙首擢授都司僉書隨征差往江西一帶聯  
絡義勇復命陞調練禁旅坐營叅將繼晉總兵惜僻處海  
瀕無所憑藉權柄日已下移秉鈞尚且束手維時僉謂當  
事者早能用上琛司閫外之重則上馬擊賊下馬作露布  
豈出古人下哉無何翠華西指敵兵長驅而至如升虛邑



上琛將母曰夫人正室陳夫人暨兒女寄寓長樂縣獨有  
妾蕙娘及一老蒼頭自匿洎兵馬臨城將肉薄上琛不告  
於朋友不語及後事晨起正冠服北面再拜叩首訖中堂  
仰藥端坐而終先是蕙娘盛妝求請從地下琛笑曰若  
果有志當先我一酌視其飲畢目將瞑浩然進杯曰小臣

不才一死報累世厚恩  
潘崇理身諸臣錄作趙寧人蓋其子也陳揚園三山琉璃史狀作  
同時不道以閩縣市井人也友曰好閒與等輩釀飲而已  
趙昂南唐逸史懷貴亦其子

敵兵薄也共父語以髮難久存龜曰此髮殊不易薙家中  
以為廣言匪介意迨日將夕誠帝宰雞貫酒痛飲登樓閉  
門疑若就寢狀次早里巷紛糾呼之則已自經於樓上容  
顏不改時值變亂赴吊者趾蓋相錯

論曰三代遠矣流覽史策漢唐宋之亡也盡節死義者指  
不多屈豈搽敵家搜討未周歟何寥寥不數見也我朝靖  
難時死國遁逃不可勝計甚至有東湖樵夫洎夫失國不



肯覲面偷生者何處茂有曾胡二公從容就義當矣復有  
市井之趙卯於是見

祖宗三百年隆儒重道深仁厚澤有以也夫





共曾周傳

兵斌卿字明輔。又稱虎癡。莆田縣人。少壯勇喜讀書。父某。四川狄縣典史。死播賊難。以官微未叙。斌卿年未冠。赴闕下陳。寬有旨。贈其父官通判。蔭一子興化衛戶。斌卿襲官。著績海上。擢銅山把總。未幾。陞福建撫標遊擊。崇禎十年。晉浙江寧紹參將。統水師鎮戶山。勦撫互斥。屢建殊勛。加

卿存

本兵史可法朝夕機務。甲申三月。北都變。

南京。元弘光馬士英當國。起阮大鍼蔡奕琛與東林水

火。因恤國是。斌卿上疏痛陳時弊。忤政府。掛平蠻將軍印

出鎮廣西。隆武元年秋八月。輔臣黃道周言。黃斌卿文武

兼優。忠勇性成。先朝歷建膚功。從偏裨致位。建牙在南都。

不屑說隨。為邪回所擯。置雄才於南徼。漏壤殊失。恢復勝

算。奉旨差科。臣周星領勅。星馳召見。既至上御便殿。詢出



英雄以占春大海左占復重慶居首功兵最強嚴紀律同  
湯展與張獻忠戰於合州之多功城獻忠大敗僅以身免  
自是膽落不敢復出成都弘光元年封平寇伯旋晉恢蜀  
侯有衆三十萬自黃鵠渡至九龍潭長江二百里舳舻蔽  
天旌旂耀日所至士女恬嬉若不知有兵革以故樂輸將  
餉益不匱英於是毅然有恢復志每語偏裨不盡取昔日  
封疆以還祖宗安敢言勛丙戌秋七月北將孔有德重兵  
窺成都獻忠從數騎出探為孔裨將劉進忠一矢中斃先  
是獻忠不得志於漢中謀欲東下荆吳不果者為英沮也  
獻忠已死平東以下四將兵馬奔潰咸切齒於英出不意  
射英于渝河英生平師出以律又曲體下情軍中鎧甲器  
仗鮮明奪目敵人望而氣懾徒兒凜賞罰臨陣競出死力  
至英死後四川遂不振蜀父老抵今言曾都爺淚猶泉涌  
言其衆三十萬守重慶之南并瀘夔等州皆其屯營故址



賊在北岸相持念多功城戰威委之以去云楊展嚴守  
瀘河賊欲由激渡瀘竟不可得展與英口心協力誓死報  
國徃徃相犄角得力

周之藩浙東人也字長屏天資醜醜崇禎末年官福州前  
營把總以功加撫標遊擊平尤溪平和山寇顯名甲由  
月變聞福建巡撫張肯堂發兵勤王之藩同黃漢良張瑞  
統屯北征至中途南京改元授之藩遊擊將軍駐鎮江每

渡江巡探多有斬獲以功陞副總兵官嗣京口特設水師  
移之藩守圖以嚴紘律謹斥堠孟河一帶賴以無恐迨  
都再失大小臣工退駐杭州之藩從蘇觀生鄭鴻逵等  
唐藩入福州即位改元加正總兵以屢立勲績封靖逆伯  
時主上行在建寧之藩感殊遇也駕不離咫尺丙戌夏抄  
駕由間道達汀州將內東粵

城上始得報倉

皇  
之藩見兵馬如雲恐駕難

子曰我唐王



也敢與者污吾劍衆共環射矢集遍體女毛目方瞑日溽  
暑之藩厄五日方殞顏色未改

論曰人亦有言欲天下太平須文官不愛錢武將不惜死  
夫文官貪財為中人以下言也若介冑之夫日履行間不  
生之際則亦何可易言黃斌卿曾英出身戎伍痛天步艱  
難誼不反顧至死方已周之藩矢志建功事勢瀕危捐七  
尺軀期脫主于厄上與紀信韓成共垂不朽求之學士大  
夫不可多得况武弁乎况武弁乎

此冊筆法簡潔非字句間有  
所累疑他大有妄為龍段也  
黃廷周一信似在列前





